

DIBÜCIKILA DYÀ ÉTATS-UNIS



... diswa dyà Mukalenge bwà bintu kampànda kwenzekabi ku misangu. Twètù kuya ku Denver, ànu àbìdì adi panshì aa, ne kwalukila. Ndi ngèèla meeji ne ndi muswè kufilà lwàpòlù, lwà masangisha ne: Áwva àmwè à ku masangisha matàmba bwímpè ankaadiku mupete kùkaadi bidimu byàbùngì. Tuvwa bapetè cikondo cilengalèngààyì. Bantu bapicile ndambù pa binunu bìbìdì bàvwa bafile myoyi yàbò kùdì Kilistò, pa kuumusha aba bààkapeta dibàtiiza dyà Nyumà Mwímpè, katùyì tubala bimanyinu binène ne maalu à kukèma bìdì Mukalenge wetù munanga Yesù mwenzè munkaci mwà bantu mwàmwa mu Denver. Tuvwa ne dipòngoloka dinène, ne didìsanga pàmwè dinène dyà bantu. Tuvwa babange ne bantu batwè ku binunu bitaanu, cyàkumpàla. Nènku tuvwa ku Mammoth Gardens. Kàdi mu dilòlò diisàtù, kakùvwakù nànsha mwaba wà bantu kwimanabù to. Tuvwa bapicile mu cikondo cilengalèngààyì, cyà malòlò àtaanu.

² Twètù kuumuka kuntwaku, bwà kuya ku Canada, ne nsongààlùmè wanyi ne mémè. Nènku twètù kubwela mu mikùnà, ke cipepèlè cyà nêjè kulwaci. Ndi ncinka ne nuvwa búmvwè bwalu abu, ku bisanji byènù. Ne bantu batwè ku lukàmà ne makumi mwandamukùlù ne mwandamukùlù bàvwa bafwèmu. Nènku tuvwa bakàlamija mu nêjè munda mwà—mwà—mwà matùkù àbùngì, kuulu kwà mikùnà kwàka. Ke matuku àà disangisha dyètù kupitàwù, ki kutùkèngelabi, bwà twètù kwalukila kumbèlu mpindyewu, kumpàla kwà twètù kuumuka kàbìdì. Pa nàнку tudi twitabuuja ne byònsò abi bìvwa pàmwàpa bwà diswa dyà Nzambi, bwà ne neikale ma—masangisha matàmbe bwímpè, ne bikwàbò bintu kàbìdì. Yèyè ùvwa ne cintu kampànda cimana kulongolola bwètù twètù citùdì katùyì bamanyè to.

³ Tudi bu bàdì twendela mu buloba bwà mifitù, kàdi kí mmu mifitù to. Tudi ànu twenda tulonda, mùyaaya Bukènkè amu, dîbà adi tudi twenda tulonda Bukènkè.

⁴ Nènku Taatù Wetù wa mu Dyulu pàmwàpa ùvwa ne cintu kampànda citùdì twètù katùyì bamanyè bwalu bwàci nànsha. Kùvwa kufwànyine kwikala njwù kampànda yisanganyibwa kumpàla kwàka. Anyì, kàbìdì, Yèyè ùvwa mufwànyine kwikala munkaci mwà kukwàta mudimu pa muntu kampànda wa kutwàla. Nudi numòna's, Nzambi ùdi mwà kukwàta mudimu ànu ne muntu umwèpelè mùshindù awu; Úshintulula ditùnga dijimà ànu bwà muntu umwèpelè awu, bwà kubàbwejamù. Ne pa nàнку tudi bamanyè ne cyònsò cìvwa bwà butùmbì bwímpè bwà Nzambi. Nènku tudi tuMusàkidila bwà bwalu abu, ne bwà kutùkùba. Nènku kùvwa bààbùngì, tudi. . .

⁵ Billy ne mêmè twètù e kubàkwàcisha bwà kubàkòka, mu njila mujimà amu ne bintu byà mùshindù awu, bantu bàvwà ne tùshinyì tupete njiwù ne bikwàbò byònsò. Kàdi twètù twakapàtukamù kakùyì lutàtu nànsha lukesè to. Tuvwa bapàtùke mu njila musangu ùmwè, kàdi aci cìvwa ànu bwà katanci kakesè cyanààna. Kàdi muntu kampànda kuntwaku, mu madimi maalàbàle kulwayè e kutùkòka ne katùmbà. Ànu munkaci mwà kusenunuka; kùvwa busenù bwàbùngì be.

⁶ Kàdi cìvwa cìmwè cyà ku bintu bìvwàbò kabàyi bapete ntàntà mule. . . kabàvwakù mwà, bantu bakole kabàvwakù mwà kuvùluka ne bàkaatukù bapetè cipeepèlè cicolè cyà mùshindù awu, mu ditùnga amu, mu cikondo cyà cidimu aci, mu Roundup, mu Montana nànsha. Nènku tuvwa. . . Tudi bamanyè ne cintu kampànda cyà pabwàci menemene mùshindù awu, Mukalenge wetù ùvwa ne cyanza Cyèndè mwòmù mushindu kampànda. Bivwa bwà kiipàcìlà kampànda, bwà—bwà dyàkalengèlè dyètù. Bwà dyàkalengèlè dyètù, ki kabingilà nkwòkò aku.

⁷ Ki mêmè kubìikila Mwanèètù Neville, paanyimà pàà mêmè mumanè kwalukila, mêmè kwamba ne: “Nèngìikalè kumbèlu mu dyàlumingu. Nènku—nènku bu wèwè muswà bwà mêmè, kupweka ne pàmwàpa kwangata kàlaasà kàà Dyàlumingu, mòna’s, nebìikale bìmpè.” Ki mêmè kwamba ne: “Dìbà adi nèngìikalè. . . ne nèngìikalè ne disànkà dyàbùngì dyà kufikakù.”

⁸ Yèyè ne: “Mòna’s, bushùwà’s, Mwanèètù Bill.” Kwambayè ne: “Tudi ànu ne disànkà be bwà wèwè kulwa,” ne mwoyi munène munzulula ne mwakidilu mulenga, mùshindù awu. Ne pashìishe kucipicishayè ku ndongamu wèndè wa ku cisanji, makèèlèlà awu. Pa nànkù tudi ne kusàkidila bwà bintu byònsò ebi.

⁹ Nènku mu dindà emu, mpindyewu, bu mùdìbi ne n’Ditùkù dyà Maamù. Bantu bàbùngì, nenuumvwe mayiisha à Ditùkù Dyà Maamù myaba yònsò, ne bantu bàakula bwà maamù, cìndi ngèèla meeji ne ncìmpè be. Tùtekàayi aci ku luseka bwà citùpà cyà masangisha cyàlonda.

¹⁰ Mu dindà emu mvwa mumanyishe, ne, cyè—cyena bwalu cyà *Dibùcikila Dyà Ètats-Unis*, ki cìmvwà muswè kwakulapù. Bwalu, nuvwa pangàpa buumvwe ndongamu wa ku bisanji byènù, ne nenùbyumvwe byàbùngì leelù ewu. Nènku nekwikale diyiisha dyà Ditùkù dyà Maamù, pàmwàpa, dilòlò edi mu masangisha. Nènku ki mêmè kudyàmbidila ne, mu dindà emu, ndi mufwànyine kumanyisha ne: “di—dibùcikila.”

¹¹ Mvwa mwakùlepu ku Denver, ashàadi aa, kabiyi ànu menemene mu mùshindù ùndì ngiipacila bwà kucifila mu dindà emu to, bu Nzambì mwà kuswà. Nènku, cìvwa, tuvwa bapicìle naaci mu cikondo cilengele be. Mukalenge ùvwa ànu mutùbènèshe mu mùshindù mulenga be. Cìdi misangu mikwàbò citùpèèsheku. . .

12 Nudikù ànu ne cyà kunyùkishiibwa ndambù, bwà kujingulula cìdì maalu, kí mmwòmo anyi, misangu mikwàbò? Nènku tudi tulòmba bwà Nzambi wàcyènzakù.

13 Nènku, byôbì biine, kuntwaku, patwàkajikijà... Beena kantu-ku-Byanza bàà mu Denver ki bàvwà batùùdile masangisha awu mfranga, nènku cìvwa cishìilàngàne kakesè ne ditùùla dyà mfranga dínkaatùku mupete kwónsò eku.

14 Kàdi pa ciibidilu, bambi, pàdìbo batùùdila masangisha mfranga, nenwambe ne... “Nuvwa bamanyishe bwalu abu anyi?” “Èyo, kùdì èkèleeziyà.” Aci’s cìdì ànu bu cijikila. Mbalami bàà mikòòkò; mbaswè bwà mikòòkò yàbo kucimanyayi. Aci’s cìdì ànu mwàkù mulenga. Ki bwalu bwàbo mbòbò abu.

15 Kàdi Beena kantu-ku-Byanza bàvwà bòbò bashìilàngàne ndambù; Bàvwa bòbò baswè bwà bàà pa buloba kucimanyabo, pa nàнку bàkeelamù ndola mitwè ku binunu bisàtù anyi binaayi ku dimanyisha ku tùshinyi twónsò, tuutaxi, ku mùlù wónsò à tùshinyi, myaba yónsò; Tuvwa bapìcìle mu cikondo cilengalèngàayi.

16 Paanyimà pàà disangisha dimanè kujika, kumbùikidilabò ku luseke, bàmba ne: “Mwanèètù Branham, citùdì mwà kukwenzela ncinyi mpindyewu? Tudi neebè dibànzà dyà búngì kaayi?”

17 Mémè ne: “Mòna’s, mu bushùwà bwà bwalu, kí ndyà cintu nànsha cimwè to.” Mémè ne: “Kanwèna naanyi dibànzà dyà cintu nànsha cimwè to.” Mémè ne: “Nwènù, mfulaayi musinga wà ku cilààlà-beenyi, mwaba ewu, panwìkale baswà.”

18 “Kaa, tudikù baswè bwà kukwenzela cintu kampànda.” Kàdi kabàvwakù bafwànyine... ncivwakù mufwànyine kwangata cintu kùdìbo nànsha.

19 Ki mulngolodi wa ndongamu kubàkùngwijayè. Kwambayè ne: “Ndi ngèla meeji ne yèyè ùtukù munange kulemba ne kulòba, kí mmwòmo anyi?”

Yèyè ne: “Èyowà.”

20 Ki umwe wa ku beena kantu-ku-byanza uvwa ne madimi maalàbàle kuntwaku, e kwambayè ne: “Mémè nemmupèeshèwu ànu bu màtàpishi.”

21 Èè, Mukalenge Moore kubàndayè bwà kuàmònayè. Ûvwa ne cyà kwalukila ntàntà wa kilòmèètà makumì àtaanu ne yisambòmbò, mubànde paanyimà pàà kàbalù. Mémè kwamba... Mukalenge Moore kwambayè ne: “Ndi muswè kumòna Mwanèètù wa bakàji Branham musòmbè pa kabalu, ùya kuntwaku.” Pa nàнку yèyè, bòbò, ne... .

22 Kàdi, paanyimà pàà cyòcì aci, nànsha nàнку, bòbò kuya kuntwaku ku ferme ku Silver Plume, mu Colorado. Eci cìdì ne cyà kwikala ku luseke elu mpindyewu. Ki kusumbabò kaa cipaapu kakesè kàà budimi kuntwaku, ne munkacì mwà kungashila nzùbu wa bibambalu bitaanu kuntwaku

mpindyewu bwà . . . ku Silver Plume, mu Colorado, mwinè amu munkàcinkaci mwà mikùnà. Pa nànkù, nwènú balobi bàà mishipa, ngèèla meeji ne ncikondo cîmpè, pa nànkù ncifwànyine kwikala mwaba mwîmpè wà kwikishila, ne paanyimà pàà masangisha ne bikwàbò, bu Nzambi mwà kwanyisha. Aci ncimutàngile Yèyè, nudi numòna's.

²³ Ndi njinga mpindyewu kukoka ntèmà yètù ku Dìyì. Nènku ndi ànu munange Dìyì, Dìyì didi ne mwoyi dyà Nzambi. Didi, munda mwà Dìyì mùdi Mwoyi. Mpindyewu: “Dìyì, dìleetà, ditu dishebeya, kàdi Nyumà ngudi ufila Mwoyi.” Ne Mwoyi wùdi mu Dìyì, bwalu n'Dìyì dyà Nzambi. Mwoyi wùdi wùsanganyiibwa mu Dìyì Dyèndè.

Cileejilu bu mèmè mwà kukwambila ne: “Ndi nkupèesha . . .”

²⁴ Wèwè udi wamba ne: “Ndi ne nzala, mu dindà emu, Mwanèètù Branham. Udikù mwà kumpà ndola yìtaanu anyi?”

²⁵ Ndi mufwànyine kwamba ne: “Mèmè nèncyènzè.” Mpindyewu, kàdi mwoyi mu cyòci aci ànu bùngì budiwu mu mulayi wànù.

²⁶ Ke mùshindù ùdibi kùdi Nzambi. Pàdi Nzambi ùlaya cintu kanà cyònsò, díbà adi cidi Nzambi aci, Dyèndè. . . Bikèngela ìkalè mu Dìyì Dyèndè. Nwamònu anyi? Dìyì edi kadyèna mushinga. . . Dìyì edi didi ànu mwómùmwè ne Nzambi. Didi Nzambi.

²⁷ Dìyì dyèbè ke cyùdi. Ke cidi cikuswika; mutùvwà ne ciibidilu cyà kucibiikila. Cidi cikuswika ndìyì dyèbè. Twètù katùyì mwà kwangata dìyì dyèbè to, díbà adi ncyèna mwà kwikala ne dyyeyemena to. Kàdi mèmè mwà kwangata dìyì dyèbè bwà cintu kanà cyònsò, díbà adi mmuntu wa luumù.

²⁸ Ne Bible mmwambe ne: “Ku cibangidilu kwàkadi Dìyì, ne Dìyì dyàkadi ne Nzambi, ne Dìyì dyàkadi Nzambi.” Nwamònu anyi? Nwamònu anyi? “Ne Dìyì dyàkavwijibwa mubidi, ne dyàkasòmbela munkaci mwètù.”

²⁹ Bu twètù mwà kwela meeji, nùnkù, buloba mene mutùdi basòmbèle emu, mu dindà emu, n'Dìyì dyà Nzambi. Muci wàwa n'Dìyì dyà Nzambi. Ne wèwè, mubidi wèbè, n'Dìyì dyà Nzambi. Nzambi wàkamba dìyì e kufùkiibwawù mùshindù awu, muwènze kakùyì ku cintu nànsha cìmwè to; pàvwàku kakùyì cintu nànsha.

³⁰ Nukààdikù bamòne ne mwoyi wà muntu ewu, mmufùmìne penyì anyi? Kabùlu kàmwè kakesè kàà mashi, kakesè menemene mu mùshindù wà ne disù dyà muntu kadìyì mwà kukàmòna to; ànu ku lumwènu lunène, lwà bukolè bwàbùngì. Kàdi mu kwòkò aku mùpàtuka muntu wa bujitu bwà kilò makumi àsambòmbò ne mwandamukùlù, makumi citèemà. Aci ncifùmìne penyì? Nwamònu anyi? Nzambi ùvwa ànu mucyàmbe, nènku

ki kutwàdijaci, ku bufùki, cyènda cikola, ki cyôci aci kutwàla ànu menemene. Wàkamba díyì mucì wònsò kwikalawùku, cintu cyònsò, kwikalanganakù. Nènku ncintu cilenga be, cintu cilenga cyà dikèma, mu dindà emu, bwà kutàngila Díyì dyà Nzambi.

³¹ Mpindyewu, eci, mu dindà emu, mu Dipungila Dikùlùkulu, tubuulula mu Kulondolola. Mvwa mwenze bu musalùkekù ndambù. . . Panùcìdì nubuulula mu Kulondolola, nshapità wa 18 apu. Ndi mucyòkè ànu ndambù. Kàdi bu Mukalenga mwà kuswà. . .

³² Ncyèna mutwìshìibwe to; netùmanyè byàbùngì mu diisàtù dilòòlò. Bu Mukalenge mwà kwanyisha, ne èkèleeziyà ùdyùm vwa mulombèdiibwe mùshindù awu, ndi muswè kwangata diisàtù, diinàyi, diitànù, diisambòmbò ne dyàlumingu, bu ditàbuluja kaaba aka, ànu ditàbuluja dyà dilongesha cyanàànà mu Díyì. [Disangisha didi dyàmbe ne: “Amen.”—Muf.] Diisàtù, diinàyi, diitànù, diisambòmbò, ne dyàlumingu, ànu bwà kulongesha pa Díyì; kabiyì bwà masangisha à dyondopa nànsha, kàdi dilongesha. Pàm wàpa Mukalenge neàtùlombòlè mùshindù awu. Ne pashìishe tudi. . . ndi ànu munangè bwà kwikala neenù ne kwenza bwobùm wè ku nyùngùlukilu wa Díyì, pàm wè neenù. Twasàkidilaayi, wa bùngì, bwà “amen” wenù mwìmpè, mulenga wa dikema awu.

³³ Mpindyewu, mu nshapità wa 18 wa Kulondolola, ne kubangila ku mvensà wa 12, tudi tujinga kushìndikila meeji ètù, ànu bwà katanci kakesè cyanàànà pa cyena bwalu cyà musinga mukolè cyà ditùkù edi. Kulondolola wa kumpàl-. . . anyì, Kulondolola Mwibìdì, mfwilaayikù luse, Kulondolola Mwibìdì 18.12, nènku netùbalè citùpà cyèndè mwab’ewu, ne kumòna ciikala Mukalenge wetù muswè bwà twètù kumanya.

Nènku ki mùsànjeelà wàkaya kabùkila Mìikà kwakulayè nendè, wàmbe ne: Tàngilà, mèyi à bapròfetà àdi àmba bimpè byà mfùmù ne meeji àmwè; anyishà bwà díyì dyèbè díbà adi, nyèwù nkusèngelela, dikalè bu dimwè dyà ku ààbò, ne wàkulè bimpè.

Ke Mìikà kwamba ne: Bu mùdì MUKALENGE ne mwoyi, ànu cyàmbà Nzambi wanyì aci, ke cingàmbà.

Kàdi pààkalwàye kùdì mfùmù, mfùmù kumwambilayè ne: Mìikà, tuye ku Lamòtá-gilàdà bwà kulwangana mvità, anyì túbengè bwà kuya? Ki kwambayè ne: Bàndaayi, nùkàtùtè dyàkalengèle, ne bóbò nebàfìdiibwè mu cyanza cyèbè.

³⁴ Mpindyewu, bwà kushìndamijilla meeji ètù bwà katanci kakesè; ànu díyì dimwepelè cyanàànà kùdì Ye cyàkàbìdì, pa cyôci eci.

³⁵ Taatù Wetù wa mu Dyulu, ne myoyi yà kusàkidila ntwètù aba tuseemena Kùdì mpindyewu mene, bwà misùukà mijimine, bwà aba bàdì mu lukèngelu, bwà èkèleeziyà. Bwà, wányishèku

bwà Nyumà Mwímpè àbwelè mu Díyì lùkàsàlùkàsà mpindyewu, tudi tulòmba. ÀDìbwejèku buludi mu mwoyi wònsò ùdi ne dijinga kaaba aka. Nènku pààfilàYe Mukenji Wèndè wà bukolè wà Díyì munda mwà mwoyi, twàsongelakù bònsò nkèlà ku Wòwò awu, mu dindà emu; twenda tuya, tushiya tabernacle, twenda tucyònkómoka ne tutùmbisha Nzambi, twamba ne: “Myoyi yètù yìdi yilákuka munda mwètù, bwalu bwà Bwikadi Bwèndè.” Bwalu tudi tulòmba nùnkù mu Dìnà Dyèndè. Amen.

³⁶ Cyalu cyètù ncishindàmèene, mu dindà emu, pa bwalu kashondo. Ne Dipungila Dikùlukulu, bwànyì mèmè, ditu ànu mundidimbi anyi di—anyi didyànjila kuleejibwa dyà Dipungila Dipyadiya. Misangu yàbùngi, muntu utu wamba ne: “Mwanètù Branham, bwà cinyi utu wèwè misangu yònsò ànu wangata Dipungila Dikùlukulu? Pàmwè ne misangu yònsò, mu dyangata dyà cyena-bwalu, udi upingana mu Dipungila Dikùlukulu.” Ntu ngénza nànkù bwalu ntu muswè difwànyikija. Ntu muswè . . .

³⁷ Dilonga dyànyì dyà kàlaasà nditàmbe kushàádila, ànu munùdi bònsò bamanyè. Mùshindù ùmwèpelè ùndi mumanyè wà kwikala pabwìpi ne cidi mu cyòci, ngwà kumòna cìvwà citembelu, bwà kutàngila cìfùndu ne kumòna cìvwàci. Nènku díbà adi ndi mmanya cìvwà *cyòci aci* necikalè cintu cìfwànàngane ne cidi apa *eci*, bwalu cidi ànu mundidimbi wàci. Nènku ntu ngwòsha dísu paanyimà misangu yònsò mu Dipungila Dikùlukulu bwà kumòna cyàkenzà bàna bàà Izalèlèlè, kumòna cìvwà dinyoka dyà mpèkaatù, kumòna cìvwà bwakàne bwà bapròfetà, kumòna cìvwà bintu byònsò abi; nènku díbà adi nempetè cingènyingenyi cyà *eci* cidi apa, cìvwà cidyànjila kuleeja mu mundidimbi wà cìikalàku ku nshìikidilu wa byònsò ku ndekeelu.

³⁸ Mu cikondo *eci*, kùvwa cintu cinène cyàkenzekelà Izalèlèlè. Cìvwa mmu mìdimà yà mundankùlù.

³⁹ Mu Dipungila Dikùlukulu, bu Mukalenge mwà kwanyisha, pàmwàpa mu masangisha àlwalwà, ndi muswè kuleeja mùshindù ùvwà Bikondo Mwandamutekète byà Èkèleeziyà bifwànyikijibwe mu Dipungila Dikùlukulu. Mùshindù wàkabangàbo ànu menemene bu ku—ku cibangidilu cyà Bikondo byà Èkèleeziyà wa bàà Bisàmbà byà bendè, ne kupìcila buludi mu cikondo cìfwànàngane cyà mìdimà, kupàtukamù e kubwela mu cikondo cyà butùmbi cyà Mpenta, ku dipweka dyà Nyumà Mwímpè mu èkèleeziyà wa ku cibangidilu wa . . . mu cipungu cyà beena Yudà. Pashiishe kupìcila mu cikondo cikwàbò cyà èkèleeziyà wa bàà Bisàmbà byà bendè, kupìcila mu cikondo cyà mìdimà, ne pashiishe kupàtukà cyàkàbidì mu Bukalenge bwà bidimu cinunu, ku ndekeelu.

⁴⁰ Mpindyewu, mùshindù ùvwàbi ne kale wàwa mu nkàmà ya bidimu yà munkaci ayi, mfùmù munène ewu Aakàbà

kubwelayè mu bukalenge. Kàdi ùvwa mwenzè ànu bu uvwa wendela mu luumù lwà bamfùmù bakwàbò bàà Izalèlèlè, biinè àvwà. . . Aakàbà, yéyè mwine, ùvwa mwenzè bu mwena—mwena kwitabuuja wa ku mikàlu. Ntu díbà dyònsò mmubala ànu mùshindù awu, bwalu ùvwa muntaci ewu ùsanganyiibwa *dyàmùneemu* dyà lupangu, muntaci mukwàbò ùsanganyiibwa *dyàmwàmwa* dyà lupangu.

⁴¹ Kùvwakù mwà kumanya nànsha kakesè mwaba wà kwimanyina, ne muntu wa kàyì mutwè makàsà panshì mùshindù awu. Anyì, muntu udi wamba ne mmwena Kilistò, kàdi kàyì mutwè makàsà panshì, kwena mumanyè cyà dyenza ne muntu awu to. Leelù ewu mmwena Kilistò; màalabà kwèna umanya ne ùdi penyì to. Mu èkèleeziyà leelù ewu, ùcyònkomoka ne wimba misambu ne ùtùmbisha Nzambi; kàdi màalaba, ùpàtuka ùkanwà maalà, wàkula bwakùlavi, ùnyemakana wàtwa eku ne eku. Díbà adi muntu wa mùshindù awu mbìkolè bwà kwenza nendè cintu.

⁴² Ndi mvùluka, pàncìvwà nsongàalùmè, musangu kampànda tuvwa ne kàbalù kàà—kàà kale, kàvwà ne ciibidilu cyà kutùpika mpangu misangu yònsò. Nènku ndi ngèla meeji ne bàabùngi bàà kunùdi nwènù bantu balùme, bàà mulongo wànyì ewu, nudi bafwànyine kumanya kale wàwa mu matùkù à túbalù, matùkù à matempu. Ntu mupwekèpwèke ne mùsèèsù ewu, misangu mivulè, ngènda ngèndesha kàbalù nkòka ditempu, mèmè mwine. Ndi ne bidimu makumi ànaayi ne bitaanù. pa nàнку, bàvwa. . . Ndi mvùluka, kàbalù kàà kale aka, tuvwa tukàtenteka cikòkedi ku nshìngù, munùdi mwà kutenteka ngombe anu, bwà kukàpangisha bwà kutùpika cimanu. Kàdi nànsha nàнку kàvwà ànu kàtùpika. Ne kàvwà kafwànyine kulembeleja cikòkedi aci ne kucitònkola, ne bikwàbò. Kàvwà kàsambuka lupangu. Nènku díngà ditùkù, divwàku. . .

⁴³ Mwva ndìkonka cìvwà cikòka kalùmýànà kàà kale aku ntèmà. Kàdi kùvwà ciina cinène lwà kwinshì aku. Mpindyewu, kàvwà kiimàne mu lutende, kaa, lutùmbùke, kàdi kàvwà kaswè. . . Kàdi kùvwà àmwè mabèji à mashindà mu ciinà kampànda aci. Kàdi kutùpikakù lupangu alu ne kubwelakù mu ciinà mùvwà nkànu yònsò eyi ne bilàngilàngì, mwaba ùtùvwà. . . mu cyètù—cyètù ciinà cyà bucyafù, kubwelamù ànu bwà kudyàpulakù ndambu wa bisonsà byà mashinda awu. Kàdi byàkatùkèngela tùmwe túbalù bwà kukàpàtula mu ciinà aci. Pàkabwelàku muntwamu, kàakakàlamamù. Kàdi pààkapàtukàku muntwamu, kàvwà kàzakalala ne kàzonza mashi, ne—ne mùshindù mene ùvwàku, ànu bwà kubàkulakù ditàmà ntèntè dyà mashinda, anyì àbìdi, pààkù kiimàne mu lutende, lwàmbà kukàfikila mu binù.

⁴⁴ Ntu mwelèle meeji misangu mivule ku cimfwànyì aci. “Njila wa mushipi wa mikenji mmukolè.” Kakàvwà ànu kafwànyine kushààla kapòlòbele ànu kaaba kàvwaku munkaci mwà kudyà

aku kiikàlè kàcyonkomoka nànsha, kàdi . . .kàvwa ànu ne cyà kutùpika lupangu alu ne kuya kafyondoka kònsò ne kutàpika mùshindù awu, ànu bwà kùja matàmà musangu umwe ne mashinda à—à mûngà mùshindù mushiilàngàne. Mpindyewu, awu's ke mùshindù ùsòmbèlè ànu bantu bènza, batùpika ànu lupangu lwà mpàta wa lutende lwà Nzambi. Kanwènaku nwitabuuja aci anyi? Bàpàtuka, bàpàtuka leelù; bàbwela. Mu èkèleeziyà, bàpìcila mu cikondo cilengèle; pashiishe, màlaba, bàkacìshintakaja ne cintu kampànda cyà mùshindù awu aci. Cìdi citàmba kucikolesha.

⁴⁵ Aakàbà ùvwa ànu bu muntu wa mùshindù awu. Kwònsò kùvwà lupeepèlè lùtuuta, ki kùvwà Aakàbà ùya, ní kùvwà ku *elu* lusèke anyi lusèke *lwàlwa* lusèke. Dibàkà dyèndè dyàkamubweja mu cimvundù, ne mukàjì mukesè ùvwa mwànà wa bakàjì mukesè wa mfùmù, mwànà wa bakàjì wa mfùmù, Izàbèlè kampànda. Mulengèle kumòna menemene, mukàjì mulengèle wa njààjàmà, kàdi mu mwoyi wèndè ùvwa mubyaamùbyàle. Kàbìdì ùvwa mutèndèleedi wa mpìngù, wàkafikisha Izàlèèlè mujimà . . .

⁴⁶ Mpindyewu, mùshindù mwinè ùmvw'à kujinga kwoyilapù ànu bwà tusunsa tukesè, mutùdì mwa kwamba, mu kubwela mu ndondo wa bumaamù ebu, nwamònu's, mwab'awu. Nènku pàkaadi muntu ùkèba bwà kubwela mu dibàkà; mùshindù wà nsongààkàjì, mukàjì wìkalayè . . .Ncipite ne kutàngila ànu ku bulenga bwà kwìsù. Bìdi bìkukèngela bwà kupeta muntu udi, byònsò ne musùùkà ne mubidi bisangisha pàmwè; muntu wìkala menemene mulunda webè ne nyààneebè, wàsìkàkana neebè mu ntàtu ne mu masànkà.

⁴⁷ Mpindyewu, kàdi, Aakàbà, wàkamunanga ànu bwalu ùvwa mulenga kumòna, ngèèla meeji, ne kumusèlayè. Kakùvwà mwà kwìkala cìngà cintu mu yèyè to, bwalu, ne cikìsu cyònsò cìvwàye naaci aci's. Nènku mukàjì awu kulwàye kuntwaku. Nènku dìbà adi, mu bushùwà bwà bwalu, bu mùvwàye muswìkàkane nendè mùshindù awu, kàbìdì mumunange, mòna's, wàkafikisha Izàlèèlè mujimà ku dyenza mpèkaatù ne kudikàndameena Nzambi, ne kutònkola byoshelu byà Nzambi; kwibaka byoshelu byà Baalà. Nènku bàakatèndèleelà Baalà mu Izàlèèlè mujimà, mwine musangu awu.

⁴⁸ Mpindyewu mukàjèndè wàkafikisha Nabòtà mwakàne awu . . .Bààbùngì bàà kunùdì mbabalè bwalu bwèndè. Mùshindù wàkangatàye budimi bwèndè, ku mashimi; ku didìcipa, byà mashimi, ne kumukèbela bantèmù bàà mashimi bwà kumushiminyinabò maalù. Bwalu, ùvwa muswè kwenzela bàyèndè cintu kampànda; kàdi kushipa muntu mwakàne, ànu bwà kupeta budimi bùvwà bulamàkàne ne lupangu lwà nzùbu wa bukalenge.

⁴⁹ Byònsò ebi, Nzambi ùvwa mutàngile panshì. Nànku ke mupròfeta, Eliyà, uvwa musadidi munène, wa bukolè wa

Mukalenge awu, kwambaye cipròfeta e kwambila Izabèlâ civwâ ne cyâ kumwenzekela. Ki kwambilayè Aakàbâ ne mbwa ivwa ne cyâ kulâka mashi èndè. Mpindyewu, pàdi Nzambi mwambè cintu kampànda. . . Mu bushùwâ bwâ bwalu, matùkù awu, Dìyì dyâ Mukalenge divwa dilwila buludi kùdi mupròfeta.

⁵⁰ “Nzambi, mu bikondo byâ kale ne mu mishindù mishilleshilangane wâkaakwila ne baataatù kùdi bapròfeta, mu ditùkù dyâ ndekeelu edi ku Mwan’Èndè, Kilistò Yesù.”

⁵¹ Pa nàнку, *Edi* n’Dìyì. Nènku piikalâ cintu kampànda cibèngangana ne *Dyòdi*, cilekela. Nwamònu anyi? Mpindyewu, cintu ciibìdi, Yèyè ùdi wâkwila leelù ewu ku mupròfeta, mwena lùmònu, ne bikwàbò. Kâdi cyâ kumpâla *nCyôci eci*, Dìyì. Mpindyewu. . .

⁵² Kâdi Aakàbâ ùvwa mwenze cikisu eci. Ne wâkatungunuka; Nzambi kubèneshayè bantu munda mwâ bidimu byâbúngi. Nènku, ndekeelu wa byònsò, Yèhoshâfâta ùvwa mfùmù kumutù kwâ Yudâ, pàvwâ Aakàbâ mfùmù kumutù kwâ Izalèlâ apu.

⁵³ Nènku, dîbâ adi, Yèhoshâfâta ùvwa muntu mwakâne. Ùvwa mwânâ wa Asâ. Asâ ùvwa mwa—muntu mwakâne, ne wâkashimbula byoshelu byònsò byâ—byâ mpingù abi; kwibakulula byoshelu byâ Yèhowâh. Nènku bàvwa munkaci mwâ kwenza di—ditâbùluja, mutùdi mwâ kwamba, mu Yudâ mwâmwa.

⁵⁴ Ne pashiishe paanyimâ pàâ katanci, Yèhoshâfâta, anyi Aakàbâ’s wè, kutùmayè mukenji, ne kujandulayè katùpa kakwàbò kââ buloba, mu Suuliyâ, kâvwâyè wèla meeji ne kâvwa kèndè, kâvwâyè wèla meeji ne neâyè kakàngata. Nànku ki kukonkayè Yèhoshâfâta ewu ní ùvwâ mwâ kulwa kwenza nendè cipungidi.

⁵⁵ Nènku, mu bushùwâ bwâ bwalu, kùdi njiwù minène mpindyewu, nwamònu’s, pàakamònbò mfùmù munène ewu, Aakàbâ, kuntwaku, ne bàakamòna munène ewu kaaba aka, Yèhoshâfâta; umwe wa kùdìbo, wa civùmvù; mukwàbò, muntu mùle tèntè ne Nyumâ. Tàbàleelâayi munùdi nwenza cipungidi cyènù. Tàbàleelâayi cinùdi munkaci mwâ kwenza, munùdi nuswikàkana nwènù biinè mu cikòðkedi ne beena bupidyâ. Dilamàayi nwènù biinè bakezùke, nangànangâ mu ditùkù ditùdi ne mwoyi edi.

⁵⁶ Ndi ngiitabuujâ, èkèleeziyâ, kakùyì mpatâ nànsha mikesè ne, eci cidi cilâkuka mu mwoyi wányi. Ki bwâ cinyi ndi nkeba malòlò àtaanu aa, mu katanci kakesè emu; bwâ musangu ewu kâbìdi, kumpâla kwâ cyôci kwenzekaci, kupèèsha èkèleeziyâ ewu ditàngilula mu kaabujimâ, mu Bible.

⁵⁷ Tudi ne mwoyi mu mindidimbì yâ cikondo. Cidi mwâ kwenzeka dîbâ kanâ dyònsò. Patùdi tumòna bikondo bilwa bwâ bintu kwenzekabi; lonji mene lwâ mwena lukunâ, makolè mene. Tudi tumòna bipeepèlè byâ nèjè ebi ne bintu byònsò

munkaci mwà kwenzeka, bikupi, ne bintu byònsò bishiilàngàne. Byònsò abi mbilela kúdi dinyanguka dyònsò edi, byà dituuta dyà maabòmbè ne bikwàbò. Bàdi munkaci mwà kusopakajangana bintu mwab'ewu. Nènku bàdi munkaci mwà kunyangakaja mu cizaba cinène cyà Nzambi, bwà kukumbaja Diyì Dyèndè. Neczyènzekè.

⁵⁸ Pa nàнку: “muntu wa mpèkaatù” ùjuuka, bukolè, ne diseeswishangana dikolè. Ekèlekèle. Mémè kuumvwa mwambi mu dindà emu, muntu mùle tètè ne Nyumà, kwangata cimanyinu cyà nyama wa lwonji ne kwamba ne mufwilakanyi ne Kilistò ùvwa Russie. Cilèmà kaayi. Uh-huh. Russie kèna ne cyà dyenzamù to. To, mukalenge. Aci's ki Mifundu. Mpindyewu, kàdi mònaayi mu cikondo cinène citùdi ne mwoyi eci, didimwija.

⁵⁹ Mpindyewu, Yèhoshàfàtà ewu, mwikàle udyùm vwa bìmpè ndambù bwalu mfùmù munène wa Izàlèèlà ùvwa mwambe ne: “Lwàku, ùngendèlèku.” Ki kupwekayè kuntwaku. Ki kukwàtabò ngombe ne mikòòkò, ne bikwàbò, kufila mulàmbù. Dìbà dyònsò, mu mwoyi wa Aakàbà mwàmwa, yèyè ùvwa museeswishanganyi, bwalu kàvwa ùkukwila aci to...anyi ùlàmbula mikòòkò ayi ne bikwàbò ne mwoyi mulelèlà to, bwalu, ndekeelu wa byònsò, wàkatàmba kushindameena pa ntèndèleelu wa mukàjèndè.

⁶⁰ Nènku mònaayi, ànu muvwa Aakàbà musèle Izàbèlà mu cikondo cyà cikondo cinène cyà mîdimà cyà Izàlèèlà aci, wàkabweja dikuukwila dyà mpingù mu Izàlèèlà, cifwànyikijilu menemene cyà leelù ewu. Ànu mu cikondo cyà mîdimà; patùdi tupicila mu bàpostòlò bàà ku cibangidilu abu, cipungu ciibìdi, cipungu ciisàtù, lwà mu cikondo cyà mîdimà, bidimu cinunu ne nkàmà yìtaanu abi. Ànu mwàkasèlà Aakàbà Izàbèlà ne kubweja ditèndèleela dyà mpingù mu Izàlèèlà amu, ki mwàkasèlà èkèleeziyà wa Nyumà Mwîmpè kubwela mu tusumbù, ne kwaluja dikuukwila dyà mpingù, ne leelù ewu ncimwènekeli cyà bwena Kilistò. Nwamònu anyi? Nwamònu's, ànu mîdimà yà menemene. Nènku mpindyewu mbitungùnuke, ditùkù dyònsò; cikondo cyònsò cyà èkèleeziyà nцитунгунуке citàngile ànu ku cintu cimwècimwè aci ku katòngòbèlà kanène aku, ku ngiikàdilù wa civùmvù udi ulwa, Cikondo cyà Èkèleeziyà wa Laòdikiyà. Kaa, dìbà kaayi dyà dikwàcisha bwòwa ditùdimu ne mwoyi edi.

⁶¹ Tèèlejàayi. Ndi muswè kutonda kaaba aka mene, kumpàlà kwà mémè kuya kule menemene. Mémè ndi muyiishi wa nkùlunkulu udi ujinga kumòna cyàkàbìdì matùkù à kale awu. Nkaadiku mumònemòne byàbùngì byà ditentulangana edi, Hollywood wèngeleja Èvànjelìyò, mu mùshindù wà bingendesha bikolè ku mwoyi ne bincyòkesha. Èyowà, mukalenge. Ndi muswè kumòna ngenzèlù wa cyena kale. Ndi ncìina ne nkwèpì kutwàlwà kuvwija bwena Kilistò butàmba kulengela bwà bantu; nnjila wa njìwù's.

62 Mpindyewu, Yêhoshâfâtà ùdi ùpweka, wèla meeji ne: “Kaa, èè, mfùmù munène wa Izalèlèlà ewu, nêngiikalè ànu...Kaa, netwikalè...Nebiikalè ànu bîmpè.” Ne ànu munkaci mwà dibalakana dyònsò dinène edi, cyàkenzàye ncinyi? Wàkenza cipungidi, bwà kubànda kuntwaku kukalwisha mwena lukunà, mu didisanga, bwalu bàakamba ne: “Tudi bònsò bantu bàmwè.” Kàdi kabàvwa bàmwè to. Umwe ùvwa mmusùmbà wà mùle ne Nyumà, mukwàbò ùvwa mmusùmbà wà civùmù. Ki mbantu bàmwè to. To, mukalenge. Kanwèna mwà kwikala ne... .

63 Mîdimà kayèna mwà kwikala ne bwòbùmùwè ne bukènkè to. Bu—butùkù kabwèna mwà kwikalakù mu bwikadi bwà munyà to. Nènku cikondo cyà njiwù cidiku, mpankaci pàà bikondo. Mpàdi ànu dibò dibwela anyi pàdidi dipàtuka, ki cikondo cyà njiwù cidiku. Kakwèna lùmònu lwà kumòna bitòòke menemene to; myèndù yèbè yà màshinyi kayàkuleeja bîmpè ne bitòòke to. Mbitàmbe bwîmpè kwikale anyi mifitù anyi bukènkè. Yesù wàkamba ne: “Ikàlà ku luyà anyi ku mashikà, kwikadi civùmù to.” Bushùwà, ki mwaba wà njiwù ngwòwò awu.

64 Ne pashìshe Yêhoshâfâtà, pàakapwekàye, ne pashìshe cipungidi cinène eci cyàkenjiibwa, civwà kaciyi cisànkishe Nzambi to. Nènku mònaayi, ànu mu cikondo mene cyà dyendè, disaluka dyònsò adi mpindyewu ne: “Ndi mulengèlèlè mfùmù ewu. Nènku, kaa, ndi—ndi—ndi ne bwòbùmùwè ne mwena mutumba ewu. Ndi ne... .”

65 Nwamònu’s, dimukilàayi, aci, èkèleeziyà. Nwamònu anyi? Cyòci aci ki cidì cilela ndululu yònsò yidi minyùngùlùkile èkèleeziyà ewu, ne myaba mikwàbò. Nwamònu anyi? Dimukàayi bwà banùdi nudisanga naabò. Nwamònu anyi? Pàtukàayi buludi, ne nwikalè anyi bwà Kilistò anyi balwishi Bendè. Nwamònu anyi?

66 Mpindyewu, muntu ewu wàkenza cipungidi, ne wàkeela meeji ne ùvwa mwenzè cintu cinène. Kàdi, pàakambàye ne: “Mpindyewu kakwènakù, kumpalà kwà twètù kubànda, bìvwa bikèngela bwà twètù kukonka Mukalenge pa bwalu ebu?” Mpindyewu, Yêhoshâfâtà ùvwa mushàale ne ntèdeleelu bùngi bukùmbàne munda mwèndè amu, mu cilèmà cyèndè, cyà mùvwàye muyè kuntwaku kùdi mfùmù ewu, kàdi ùvwa ne ntèdeleelu bùngi bukùmbàne munda mwèndè bwà kwela meeji ne: “Èè, bìvwa bikèngelaku bwà twètù kukonka Mukalenge.”

67 Mpindyewu, Aakàbà ùvwa ùpàtuka buludi kàyì wàmbaku dfiyì to; cikolà ànu ngenzèlù wèndè wa maalu muuminyine, wa mubidi, wa bumùntù awu.

68 Ndi ànu dikonka mwab’ewu, èkèleeziyà, ní kabyèna nànkù ne, misangu yàbùngi, tutu benzènze bilèma. Ùdifwanyikijilaci, wàmba ne: “Èè, civwa cifwànyine kwikala mùshindù ewu,” kàdi twètù kucitèeka mùshindù awu.

⁶⁹ Ndi ngèèla meeji ne ki mwaba ùdi ditangalaja dyônsò dyà luumù lwimpè dyà mu Àmèrikè disanganyiibwà leelù ewu awu, dyà ne tudi baditèèke mu mmwènekèlu wa—wa, ùndi mwà kwamba ne, ditangalaja dyà luumù lwimpè dyà cyena Hollywood, bintu búngi cyakaa byà dibàlakana. Tudi tumòna mutangadiki ùlwa pa cibumbà cyà ku cyambilu, leelù ewu, nènku, ekèlekèle, mudyúje yônsò, ne wèla minèkù búngiyi kumpàla kwà kutwàdijayè kuyiisha, ne bintu byà mùshindù awu, ne bintu byà macimbu ne byenzi byà butàtàkàne, mu cyambilu amu. Pàkaadìbi bikafika ku dibìikila dyà ku cyoshelu, bantu kabèèna nànsha mene bamòna meeji matòòke nànsha makesè à kwenza naawù dibìikila dyà ku cyoshelu to. Ncyà bushùwà. Ki bwà cinyi buloba mmbubwele mu ngiikàdilù wa civùmùvù leelù ewu, mùdìbu bùsànganyiibwa.

⁷⁰ Ndi ndikonka, leelù ewu's. Cidi ànu, leelù ewu, ndi... Èkèleeziyà, tudi batèete bwà kutùma bânà bèètù bàà balùme mu tulaasà, bwà kulonga maalu à mu disòmba, ne byàbúngi byà mùshindù awu, bwà kumanya mwà kwenza ndongamu, bwà kubwela mu cyambilu ne kulongolola wètù... Mukenji ùdi ùtàmba kukoka, mu mùshindù wà ne neubákule bantu, ne kubákula ntèmà yàbò. Bamanyi banène bà maalu à mu disòmba bààbúngi bàdi bàpàtuka bu balongeshi mùshindù awu, ne bànèkesha ne bàlwàta bintu byàbúngi. Ki mèmè kudìkonka ànu, pàdìbo...bwà...Tudi ànu dìbà dyônsò munkaci mwà kwambilangana bwà bulenga ne dikòkiibwa dyà ekèleeziyà. Kàdi tudi tupangila bwà kubàmbila ne: “Ewu udi muswè kuNdonda, adìpidyè yèyè mwinè, àmbule nkùrusè wendè, ne àNdondè.” Ndi ndikonka ní katwèna bavwiye bulenga bwà ekèleeziyà butàmbe kulengela, bwà muntu udi ubwelamù.

⁷¹ Cileejilu, ekèleeziyà wa ba Baptistes leelù ewu ùdi ne cikèmu cyà ne: “Mùliyò mukwàbò mu cidimu cyà 44,” babweja bidimba ku binunu, ne makùmi à binunu, kabàyi bàkùdimuna mucima to, ànu bantu bàdi babwelamù cyanàànà ne bàshààla bàà mu ekèleeziyà. Nènku ciinè aci ncipangishi kùdi Èkèleeziyà wa Yesù Kilistò, bwà kubweja bidimba byà mùshindù awu. Baciikàle banwà maalà. Baciikàle ànu banwà mfwankà. Baciikàle ànu bàtwa twartà twà mfranga. Baciikàle ànu bàshima.

⁷² Bàdi bàlwa mu ekèleeziyà, bindìle bwà kubàyiikidishabò kùdi musumbà wà bayiishi bàà cyena Hollywood bàdi basàkùke aba, balwàta dibàlakana dyàbúngi, ne byombelu binène byàbúngi bitentakajangana pa cibumbà cyà ku cyambilu apu.

⁷³ Pààbi, bivwa bikèngela kwikalabò ne dibìikila dyà ku cyoshelu kuntwaku, dyà cyena-kale, dyà Nzambì dyàmbedi, bàpatuka bènda badila; kùdi balùme ne bakàji kabàyi bàlwa bwà kubàlakana, anyi kunyemakana mbilu ne kwenza maalu à macimbu à bikàsa nànsha, kàdi kutwà binù ku cyoshelu ne kumanya ne lufù lwà Yesù Kilistò kuntwaku, wàkafwà bwà

bwalu bwàbò awu, bwà kwalukilabò ne meeji matòòke kùdi Nzambi cyàkàbìdi.

⁷⁴ Ndi ndikonka ní katwèna ne mwoyi mu cikondo cyà mùshindù awu anyi, patùdi twangata batangadiki banène, bu bààbúngì bàdi munkaci mwà kukòsolola matùnga leelù ewu, bàà ku batangidiki banène bamanyike bàdi bàlonge maalù à mu disòmba ne kukoka bantu ku èkèleeziyà. Kàdi paanyimà pàà wèwè mumane kubàbweja mu èkèleeziyà, díbà adi ciwàbènzèlà cinyi? Ncinyi—ncinyi cyàbènzekela paanyimà pàà bamanè kubwela mu èkèleeziyà? Anu kulamakana ne èkèleeziyà, kàdi kwalukila ne mpèkaatù umweumwe awu ne dìjinga dimwèdimwè dyàkabwelàbo naadi mu èkèleeziyà adi. Bàdi bàalukila mùshindù ùmwèùmwe awu. Nènku ki bwà cinyi, leelù ewu, bàà pa buloba mbabàtàngile, bàmba ne: “Èè, bu muntu *wàwa* mwikàle ne ntèndeleele, bu muntu *ewu* mwikàle ne ntèndeleele. . .”

⁷⁵ Ndi ne bwôwa bwà ní tudi batàmbe kucivwija cipepèle. Cidi, ndi munangè. . . Ngèèla meeji ne, disànka, cyà bushùwà, ngèèla meeji ne masànkà ónsò adi àsanganyiibwa mu Yesù Kelistò. Ncyà bushùwà. Ndi ngiitabuuja ne nyàla disànka ne musàngeele. Kàdi vùlukàaku ne, mwanèètù, nnjya wa dipunga ne lufu ne dikènga ne nkùrusè. Nudi ne cyà kumanya aci, kàbìdi. Ncyà bushùwà. Ndi ndikonka ní katwèna bacilengeje ndambù—citambe kunefuka ndambù.

⁷⁶ Byenze bu, pámvwà ntàngila, ki mukàjàànyì kutèeka. . . Pankàävwa ne mpatuka, nènku yèyè kungaasa cilòngò cyà rose pa nkooci mu dìndà emu. Yèyè ne: “Bìvwa bìkèngela bwà wèwè kucivwàla. Mamwèbè’s ùdi ne mwoyi.”

Ki mêmè ne: “Kaa, munanga wanyì, ncyèna mumanyè to.”

⁷⁷ Ditùkù dyà Maamù ndilenga be, kàdi aci’s ncyenze ànu mùdi bàà pa buloba’s, mbabange kwenda naadi mushinga, ànu bwà kupàànyisha menemene bilòngò ne bintu byà mùshindù awu. Mòna’s, mbundù kùdi maamù. Mòna’s, maamù wanyì ùdi maamù wanyì ditùkù dyònsò dyà cidimu, èyowà’s, mukalenge, ki ng’ànù ditùkù òmwèpelè nànsha.

Ndi mwà kwamba ne: “Udi munangè mamwèbè anyi?”

⁷⁸ “Mvwa mumutùmine cikùtù cyà bilòngò mu Ditùkù dyà Maamù dyà musangu mushààle.” Èè, mwanèètù, ùdi ne cyà kwikala maamù ditùkù dyònsò edi. Kàdi dikaadi dyà bungèndààmùshìngà.

⁷⁹ Cilòngò aci ncilenga. Ntu munange cilòngò cilenga. Ndi ncyèlela meeji mùshindù ùntù ngèenza awu. . . Mùshindù mwine ùdi cilòngò cilenga’s wè. Cìdi citooyika. Kàbìdi cìdi ne dipembu. Ne mupìci wa njila ùdi uumvwa mwenyi wàci. Nyama ùpìcilapù, uumvwa mwenyi wàci. Kàdi, mpindyewu tàngilàayi, cìdi cilenga. Bu mùdi Èkèleeziyà wa Mukalenge Yesù Kelistò, Ncintu cyà citàmbe kwikala cyà butumbi; Dyondopa dyà kùdi

Nzambì, ne makolè, ne maalu à kukèma, ne bimanyinu, ne bishimà, ne budishikaminyi ku mpèkaatù. Mmwaba mulenga wà dikèma. Kàdi, tàngilàayi, pìikalàbi ne cilòngò cyà rose aci. . . Nebikengelè bwà twètù kulwa, Èkèleeziyà, bu bufùki bwònsò.

⁸⁰ Cilòngò cyà rose aci, bu mùdici cilenga, ngomba yònsò mu ditùnga mmufwànyine kucilàka bu yèyè mwà kupeta mpùngà. Kàdi bufùki mbulongolole twelè tukesè, tuumafùmà tukesè tupàtùke pambèlù apu, tùbìkidiibwa ne mmèba, ne àdi àyìpata. Wòwò awu àdi àcilama. Mmwómò menemene.

⁸¹ Nèku ndi ngèèla meeji ne, leelù ewu, twètù katùyì ne Dìyì dyà Nzambì to, ditwè kupita mwelè wà mvità wà nseke yibìdì, mu nyùngulukilu wa bulenga bwà bukolè bwà cijila bwà Nzambì, netùlekele ngomba yònsò wa mu ditùnga bwà kuCilàkaye ne kuCitùùla. NeCìkooyishiibwe. Necìikale cipangishi kùdì Èkèleeziyà. Ncyà bushùwà.

⁸² Ngèèla meeji, leelù ewu, citùdì naaci dijinga mbambi bakwàbò babìikila kùdì Nzambì, bà cyena-kale menemene, bakàyàbàle, pàmwàpa kabàyi balonge kàlaasà kààbùngì to, kàdi bàtwishà bantu binù ku cyoshelu, ne kwòkò aku bàpùnga ne lufù. Kaciyì ne disànkà ne tuseku, ne biikàle bàcyànkuya bàzòkà, ne bàfùnda dìnà dyàbò pa dibèji to; kàdi, mwanèètù, mwadi mukolè wà nkùlunkulu ne kufwilamù, too ne pàdì balùme ne bakàji banyingalala banyingalelamù ku mpèkaatù yàbò ne bàseemena pabwìpì ne Nzambì. Amen.

⁸³ Ndi nnwàmbila, tudi ne byà ne: “Èlàayi byanza muulu, mbanganyi bàdì baswè kwitaba Kilistò,” byònsò mùshindù awu. Abi’s mbìmpè, mwanèètù, kàdi aci kacýèna—aci kacýèna cyùmusha mpèkaatù nànsha.

⁸⁴ Bidi bikukèngela kunyingalala dyàmbedi, kudilongolola, kutwà binu mwaba awu kàdi kujikula mwadi mukolè. Ndi mwà kuvùluka bikondo bìvwà bantu bàà cyena-kale mwà kwendela mu tujila, bàbànda bàpweka ne njila, badila mwadi, bàyukila ne beena mutumba bààbò. Abu bàvwa beena Kilistò bàà ditùkù adi; babàmbila bwà maalu à Mukalenge.

⁸⁵ Kàdi, leelù ewu, tudi tufùnda dìnà dyètù mu mukàndà wà èkèleeziyà, ne tupàtuka tukashààla kumbèlù, ne katùyì tuBùtèèja kàbìdì to. Katùyì tubùcyùka to. “Ànu bu mutùkaadi bàà mu èkèleeziyà, mbìmpè.” Ndi mutwishìibwe ne tudi bapile mwaba awu, balùmyànà. Tudikenkètaayi. Bwalu, aci kacýàkutwà makàsà panshi ku cilumbulwilu to. To, mukalenge. Kacyàkwimana to.

⁸⁶ Ki ncintu cishààdile to ku cyà ne: “Ewu udi muswe kuNdonda, àdìpidyè yèyè mwinè, àmbulè nkùrusè wendè, ne àfwe ku ditùkù dyònsò.” Ùshààla mufwè, pa nkùrusè apu. Ncyà bushùwà. Dipùnga ne lufù! “Njila, nendondè njila,” munùtù nwimba, “ne banyààbanyà badyombola bàà Mukalenge.”

⁸⁷ Ndi ngèèla meeji leelù ewu ne, ncikondo kaayi citùdi ne mwoyi eci's! Mùdi, ditangalaja dyà luumù lwimpè, bàdi bàditeeka pambèlù mu makênkè manène maalàbàle, ne bàdi bàteeta. . . Panùdi numòna mutangadiki ùlwà mu cimenga, nudi nudikonka. Mémè, ànyi masangisha àkaadi pàwù mapùile ku cintu cìmwècimwè aci. Ncyà bushùwà. Ndi ndikonka ne nganyì udi ulwa mu cimenga, misangu mikwàbò, mmutangadiki anyì Yesù Kilstò? Mona's, bôbò bàdi ne. . .

⁸⁸ Mémè kubwela mu mwaba kampànda kaaba aka, àbìdì adi panshì aa, mùwvwa mutangadiki kampànda ne cyà kulwa. Ne Dinà dyà Yesù. . . Mòna's, bàvwa ne fòtò wa mutangadiki awu ne: “muntu wa cikondo eci,” muntu udi ne *cikampànda*, muntu udi ne *cikansanga*.

⁸⁹ Mémè, míngà misangu ndi ngèèla meeji ku mudimu wànyì wa bwambi, ne mmòna bantu bàlwa. Nènku mvwa mufwànyìne kubwela mu cibambalu cyà cilààla-beenyi, ngàmbe ne: “Nzambì, nganyì—nganyì udi bantu bàlwa bwà kumòna, mmémè anyì ng'Wèwè?” Nwamònu anyì? “Piikalàbo bàlwa bwà kummòna mémè, mbajimìne, nànsha nànkù; kàdi, Éyi Nzambì, ngupùlekù panshi, ngumùshe mémè. Ndi muswè kuleeja mpàla Webè, Wèwè Mwena kumpàla kutwimana dīngà ditùkù, ne byanza bizakalala, ne mubidì mutekète ùzakalala, bakutàngile Wèwè. Mumanyè ne musùukà wànyì mmulembeleja ku dipàngadika Dyèbè.” Tùzanjikàayi Kilstò.

⁹⁰ Leelù ewu, wèwè udi wamba ne: “Èè, mémè's ndi wa mu ba-Baptistes. Mémè ndi Méthodiste. Ndi wa mu tabernacle. Ntu ngenza *cikampànda*.” Kaa, aci kacýèna naaci bwalu to; kí ncintu to. Ndi ndikonka misangu mikwàbò.

⁹¹ Munu emu matùkù mashààle aa, mémè e kumòna di—dimanyisha kuulu, mwaba ùwva cibilù kampànda ne cyà kwenzekela mu cimenga. Ne díyì dyà muntu, dīnà dyà muntu difùnda mu màleetà manène ku nyùngulukilu, mùshindù *awu*. Nènku lwà kwìnshì aku, mu kaaditumba kakesè, bàmba ne: “Yesù Kilstò umweumwe awu makèèlèlè, leelù, too ne kashidi,” lwà kwìnshì mu ditumba. Nwamònu anyì?

⁹² Mbuumùshe cijila cyònsò mu Kilstò, ne bacitèèke pa muntu kampànda, anyì èkéleeziyà kampànda, anyì bulongolodi kampànda. Mwanèètù, ndi nkwabwila ne, udi mwà kwitabiibwa mu dibàlàkana, ne lukutukutu lwà Hollywood, mùshindù awu, mu. . . kùdi èkéleeziyà. Kàdi, mu Bwikadi bwà Yesù Kilstò, Yèyè ki Umwèpelè wa kutùmbisha. Ncyà bushùwà. Mpindyewu, aci's mbulelèlè, mwanèètù wa balùme munanga ne mwanèètù wa bakàjì.

⁹³ Kanùmfikidi munda to. Nwènù vùlukàayi ànu ne mémè ndi munkaci mwà kunùyiisha. Ndi muswè kuyiisha byenzè ànu bu ne edi dīvwa diyiisha dyànyì dyà ndekeelu dīmvwà ne cyà kuyiisha mu matùkù ànyì à mwoyi. Ndi muswè kuyiisha, diyiisha dyònsò

díndi nyiisha, bu ne mwawa muntu wa ùpùnga ne lufù ùyiisha bantu bàdi bàpùnga ne lufù. Ne, ke cínđi; bukènkè bwànyì bùdi bwènda bùbwita, ditùkù dyònsò; ne bwèbè, pààbò. Nènku tudi bantu bàà cifwàkà bàdi bàpùnga ne lufù. Ne butùdi naabò mbwà kukùngàmangana ne Nzambì udi ne mwoyi, òmwè dyà ku matùkù àdi panshi aa, kàdi bìdi bikèngela tütambè kwikala menemene ne meeji matòòke bwà bwalu ebu.

⁹⁴ Ànu mu dibàlakana, ne kwenza maalu à lukutukutu, kushààla wa mu èkèleeziyà, ne kuya *eku* ne *kwàka*, kwenza maalu mùshindù *ewu* ne mùshindù *wàwa*.

⁹⁵ Bivwa bitàmbe bwìmpè twètù kwenza masangisha à cyenakale mu nzùbu yètù, twela mbilà kùdi Nzambì, munyà ne butùkù. Ditùkù òikaadi pabwìpì ne: “cikondo cyà dikènga, cikondo cyà lutàtù.” Bible mmwambè ne: “ditùkù dyà mìdimà.” Ne twètù tudi ne mwoyi munda mwàdi.

⁹⁶ Mùshindù mwinè wàkapweka muntu munène awu kuntwaku mu disaluka. E kukalamakanayè ne bantu bàà civùmvù, ne bàà ku mikàlu, kàdi kwela meeji ne ùvwa wènga cintu kampànda cinène, wèla meeji ne Nzambì ùvwa munkaci mwà kumubènèsha. Kàdi kàyì mumanyè ne ànu pa dībà adi mene ùvwa munkaci mwà kubweja musumbà wèndè wònsò pàmwè nendè to. Ncinyì aci? “Kasumbù kèètù kakesè, kà—kà Yudà kuntu eku, nkafwànyine kulwa ne kulamakana nèètù pàmwè ne misumbà minène yà Izalèèlà. Netwikalè cisambà cyà bukolè be.”

⁹⁷ Ki bwalu abu's. Nènku aci's ke njila wa mashimi udi dyabùlù ùlonda ànu mpindyewu ewu, bwà kubweja mufwilakanyi ne Kilistò; ne ditwishiihwa dyònsò ànu bu mùndi mwimàne mwab'ewu emu. “Netùsangishe makànda ètù wònsò pàmwè.” Katwèna mwà kucyènga to. Mmuni mùdi bantu bàbìdi mwà kwendela pàmwè, bòbò kabàyi bumvwàngàne?

⁹⁸ États-Unis ewu wènga dilabula òmwèdimwè, ànu dyòdi òmwèdimwè adi, ne cilèma cìmwècìmwè aci, pààkadisangàye ne Russie kale wàwa. Mu cikondo mene cìvwàbò bàmba kukùtula myità, kàdi twètù kudìswika pàmwè ne Russie. Nènku mpindyewu's nwamònu citùdi bapeta's, kí mmwòmò anyi? Bòbo bàdi ne ndekè yètù ne minsonkòtù yètù yònsò, ne bòmbà yètù yà mùshindà ne bintu byònsò bitèèka kuntu kwàka, bwà kutùlonzabì. Cintu cìmwècìmwè aci cidì cyènzeka mu nyumà.

⁹⁹ Pashìishe tudi tusangana ne, paanyimà pàà Yehoshàfàta mumanè kwenza cipungidi eci, ne bòbò bààkakonka. Mpindyewu tàngilàayi, tàngilàayi bàà pa buloba, yèyè ne: “Bushùwà, tudi ne bapòfeta bùngì cyanààna kaaba aka. Tudi naabo sèminère mùle tètè.”

¹⁰⁰ Kuyabò kangata balùmyàna bàvwà balongèshiihwe, bàvwa bamanyè maalu à mu disòmba, bàvwà bamanyè byònsò pa bwalu

abu. Yéyè ne: “Lwáyi mpindyewu, ne tudi tulòmba bwà kukonka Mukalenge.”

101 Bónsò bwàbò, mu bushùwà bwà bwalu, mu meeji àbò à musunya à didileeja, kulwabò mwaba awu bàmba ne: “Mpindyewu, tàngilàayi, twètù... Wèwè tòngùnuka bànda. Mukalenge ùdi neebè, ne Mukalenge neànùpèeshè kapese kàà buloba aku, nànkù, nebwikalè bwènù. Nenwìpate beena Suliyà abu mu njila yònsò amu. Nenùbiipàte.” Umwe wa kùdìbo mene ùvwa mudyenzèle nsèngù yìbìdì minène yà cyamù cifiike, e kutwàdijayè kunyùnguluka mùshindù ewu, wàmba ne: “Èci nùnkù, ke cinwìpatà naaci beena Suliyà.”

102 Kàdi, Yèhoshàfàtà, uvwakù mutambe kwikale wa nyumà, kàyì mwà kutwala bintu byà budingidingi byà bikàsa abi to. Ncyà bushùwà.

103 Nzambi, tùpèeshèku baa Yèhoshàfàtà bakwàbò, bàdi buumvwe bibi ne bacỳòke ne bikàsa byà cyena Hollywood ebi. Ncyà bushùwà, bàdicinkila, bàdingidija kwikala cintu kampànda cìdìbo kabàyi nànsha; bàdìleeja, banèkesha, bàpulumunangana. Kàdi pashìishe dìbà didìbo bàbwelamù, cinùdì nupeta ncinyi panùdì nubwelamù? Mbyenze bu kulomba muntu ne: “Lwàku òwelè mu cipèèlà”. Ki ncintu cikwàbò to ànu mushiki wà lusenga mukwikile mu mutù wèbè amu, wà ùkusaamisha pashìishe.

104 Mpindyewu mònaayi ne, cyùdì mwà kubabwejèlamù ncinyi? Inàbànzà kampànda kungambilayè ditùkù adi ne: “Muntu kampànda kwambayè ne: ‘Ndi mufwànyine kuya mu èkèleeziyà, kàdi ncinyi—ncinyi cìndì mufwànyine kupeta pàngàaya mu èkèleeziyà?’ Yéyè ne: ‘Byònsò bìdìbo bènza nkulongolola kwà didyà kampànda dyà dilòlò, ne bàdi... bwà *cikampànda*, *cikansanga*, ne *cikankènga*.’” Ki inàbànzà awu kwambayè ne: “Mèmè kushàala ncìyi ne cyà kwamba, bwalu ncìvwa mumaye kwà kumutuma to.” Ki bwalu abu’s. Yéyè kwamba ne: “Mvwa njinga ne ngàapetakù èkèleeziyà wa kale mùdìbo menemene bìmba misambu yà cyena-kale ne bènda lwendu lwà difwànà dyà Nzambi.”

105 Bàna bàdi ne nzala, bàdi mwà kadyà mu cipànzà cyà bukooyà. Mbitàngile Èkèleeziyà wa Nzambi udi ne mwoyi bwà kubàdiisha Dìyi dilelèlà dyà mwoyi dyà... dyà Nzambi.

106 Mwómò amu, mu dibàlakana dyònsò adi ne bikwàbò, Yèhoshàfàtà kwambayè ne: “Kakwènakù kabidì mukwàbò anyi?”

107 “Kakwènakù mukwàbò anyi?” mwàkambà Aakàbà. “Èè, cyùdì ujingila mukwàbò kàbidì ncinyi? S’tudi naabò nkàmà yinaayi bàà batàmbe bwìmpè bàà kacya, bàsòbola, balongesha, bàdiishiibwe bìmpè, bantu balwàdika bìmpè bàdiku mu ditùnga, biimàne mwaba ewu. Yònsò wa kùdìbo ne dìyi dìmwe, ne mwoyi wùmwe, ne dìyi dìmwe, bàmba ne: ‘Ndaaku! Nzambi ùdi neebe.’”

¹⁰⁸ Ndi ndikonka ne Étas-Unis ewu kî mmutwilàngane ne cintu cimwècimwè aci anyi. Ndi ndikonka ne Èkèleeziyà wa Nzambi ní kî mmutwilàngane ne cintu cimwècimwè eci anyi. Ndi ndikonka. “Èè,” múdi wàmba, “tàngilà, s’bàdi munkaci mwà kutanta. Bàdi bènza masangisha manène, maalàbàle. Bàdi bàkoka binunu musangu ùmwèpelè.” Kàdi ndi ndikonka ní kakwènakù ànu umwèpelè mutentàme. Ndi ndikonka ni kakwènakù cintu kampànda cishiilàngàne.

¹⁰⁹ Tudi tusangana ne, tudi bapetè bantu binunu makumi àsàtù bakùdimune mucìma mu mbingu yisambòmbò, kàdi paanyimà pàà mbingu yisambòmbò katùciyi nànsha ne ùmwèpelè to. Kùdi cintu kampànda cipampàlamùke mwaba kampànda. Ncyà bushùwà. Nènku cyòci cyònsò cidi ànu dibàlakana, didileeja. Maalu à pa buloba, kupìcila ku tèlevisiyò, kupìcila ku tudyòmbà, kupìcila ku dileeja dyà bindidimbi, ne mitùbù yìdi kuntwaku ayi, mbinyàngè ditùnga edi ne bintu byà budingidingi byà cyena Hollywood abi. Ncyà bushùwà. Cintu ne cintu cyònsò nciswè kwikala mu dibàlakana dinène adi. Kí m’bulelèlà anyi? Nudi bamanyè ne aci’s m’bulelèlà. Twètù katwèna kàbìdi ne ntèndeleeu wa cyena-kale utùvwakù nendè kùkaadi bidimu awu to. Mbwalu ùkaadi mulekelela. Netùfikèku, ànu mu katanci kakesè emu, nenùmonè.

¹¹⁰ Mòna’s, ncimfwànyì kaayì bulenga’s wè, anyi cimfwànyì cidì cìbindulula’s, mùndì mufwànyine kwamba. Nènku ki Yèhoshàfàtà ulwàlwa ewu, wàmba ne: “Èyowà, ndi mubàmòna bònsò. Bàdi, muntu ne muntu, mbapete mapolome àbò,” ne cyònsò ciwàku aci. “Bònsò bwàbò mbapròfetà, anyi bambi banène. Mbapàtùkile mu bilongelu binène. Ne bàdi bònsò mùshindù ewu. Mbapàtùkile mu cìlongelu cinène cyà bapròfetà, ne bikwàbò byònsò. Bònsò bàdi ne díyi dimwè. Ncyà bushùwà. Kàdi kakwènakù mukwàbò nànsha ùmwèpelè anyi?”

¹¹¹ “Èè, cyùdi ujingila mukwàbò kàbìdi ncinyi, pàdi nkàmà yinaayi yitabangana lupungu lùmwe?”

¹¹² Kàdi muntu awu, mu mwoyi wèndè amu, ùvwa ne Nzambi. Ne ùvwa mumanyè ne kùvwa cintu kampànda cyà cibi mu bwalu abu. Èyowà’s, mukalenge. Ùvwa mumanyè ne kuvwa cintu kampànda cibolè. Bwà cinyi? Swàyi nnupèeshè. . . Mifùndu kayèna yicìtèèja to, kàdi mònaayi cìndì mupete. Ndi mumanyè ne—ne Yèhoshàfàtà ùvwa mumanyè ne mwena lubombo uvwa kuntwaku awu, Aakàbà, bwà ne kàvwa mu dyumvwangana ne Nzambi nànsha. Ne Eliyà ùvwa mwambe cipròfetà ne Dìyi dyà Nzambi kùdiye. Ne mmunyi mùvwà Nzambi mwà kubènesha ciwàYe mwéle mulawu? Amen.

¹¹³ Ndi ngàmba cintu cimwècimwè aci leelù ewu, mulundà wanyì. Ne Èkèleeziyà wa Nzambi udi ne mwoyi, udi mwimàne ne lulamatu kùdi Nzambi awu, neàmbe cintu cimwècimwè aci. Kwènà mwà kusambakaja màfutà ne màyi pàmwe kàdi

kucibiikila ne ndupàndu to. Kwêna mwà kwenza nàнку to. Bikèngela wêwè nkààyèbè kutàpuluka, mwanèètù. Cintu kampànda cidi ne cyà kwenzeka. Piikalàku kushààle ditèkemena kampànda, tudi ne cyà kwenza cintu kampànda, ne kucyènza lùkàsàlùkàsà; bwalu, cikondo cyà Dyambwibwa cidi pabwipi.

114 Bintu bìdì munkaci mwà kutentamangana, bintu byònsò, ne èkèleeziyà ùdi kule menemene. Bàdi bàbala bikàndàkàndà, ne mikàndà, ne maalu-malonda byà mishindù yònsò ne bintu byònsò. Ndi mufwànyine kuya leelù ewu ku. . . Ndi mwà kuya mu èkèleeziyà kampànda, ne ndi mwà kwamba ne: “Kaa, mbanganyi bàdi bamanyè. . .” Mbamanye musambu wònsò, paanyimà pàà òmwè dyà ku matàbuluja manène aa. “Mpindyewu, ndibèji kaayi—kaayi mùdì musambu kampànda ùsanganyibwa?” Mbadimanyè. Mbamanyè ne nganyi mwinè awu. Mbamanyè ne nganyi udi mufile mpàla bwà kushààlaye Mfùmù wa ditunga, ne nganyi udi mufile mpàla bwà *cikampànda*, ne mbùngì kaayi bwà balùmyànà bàdi bendè luumù bàà mu sèndèma bàdi basèlangane, *cikampànda* ne *cikansanga*, ne *cikankènga*. Kàdi, bwà Dìyi dyà Nzambi, bòbò kí mbamanyè kantu nànsha kàmwe to. Kàdi’s ki bwalu abu. Pa nàнку tudi tufila dyàbò dibàlak-. . . Kàdi, nànsha nàнку, bàdi bàmba mùdibò beena Kilistò.

115 Kí ncisàmbà cidi ne cyà kudyúdiibwa to. Bìdi byùmukila paanyimà pàà cibùmbà cyà ku cyambilu, ki kùdici cyùmukila. Menemene. Ncyùmukila paanyimà pàà cibùmbà cyà ku cyambilu. Bàdi bàbàlongesha byonà byà mishindù yònsò, ne *bikampànda* ne *bikansanga* byà mishindù yònsò, ne malongolodi, ne mùshindù wà kwenza tusùmbù twà bansòngà, ne byònsò byà mùshindù awu abi. Ndi ndikonka aci ní ke cidi Nzambi Ncyèna naabi bwalu to, kàdi ndi ndikonka aci ní ke cidi Nzambi ùlòmbà.

116 Pààbì, Yesù wàkamba ne: “Muntu yèyè kàyì muledibwe kùdi màyi ne Nyumà to, yèyè kààkubwelakù mu Bukalenge nànsha bishi to. Ewu yònsò wàswà ku-. . . wàswà kuNdonda, àdipidyè yèyè mwinè, ne bisànkasanka byèndè byà pa buloba, àmbule nkùrusè wèndè, ne àNdòndè.” *Nkùrusè* ùdi cimfwànyì cyà “lufù, ne dipunga ne lufù.” “Ewu yònsò wàswa kwikala mwena Kilistò, àtapuluke yèyè mwine ne meeji èndè sungasunga. Àtapuluke ne byenzedi byèndè sungasunga. Àtapulukè yèyè mwinè ne bintu byònsò, àdipidyè, ne àmbule nkùrusè mujidila awu, ne àNdondè ku ditùkù ne ku ditùkù. Ewu yònsò wàswà kuNdonda awu, enzè nàнку awu.” Aci’s ke cyàkambà Yesù.

117 Kàdi, leelù ewu, tudi twamba ne: “Muntu yònsò ikale ne cikondo cyà dicyònkòmoka. Muntu yònsò atuutè bikàshì. Muntu yònsò èlè lubilà ne: ‘Àlèluuyàh!’ Muntu yònsò ènzè *cikampànda*.” Kaa, mùshindù mwinè utùdì ne musùmbà wa makòkyanganyi’s wè! Amen. Nzambi. . . Tudi tusàka misambu mipyamipya ne tuyimba lùbilulùbilu, byenze bu ne tudi tunyemena naayi lubilu tupàtukila mu cimanu, anyì cintu kampànda cyà mùshindù awu.

118 Pàndi, mèmè ngèèla meeji ne, bu twètù mwà kwimba ne *Pěpi, Neebè, Nzambi Wanyi*, bivwa bifwànyine kwikala bitambe bwîmpè bikole bwà Èkèleeziyà; misambu yà cyena-kale.

119 Tudisangana ne cisumbù cyà baji bàà maja, nsongàalume kampànda ùdi mu cisumbù cyà baji bàà maja apa, dilòòlò dishààle, ne dilòòlò edi nyêyè ewu apa wimba mu èkèleeziyà wa Nzambi udi ne mwoyi amba's? Aci's ncinyangu ku mèsù kwà Nzambi. Muntu awu anji àjaadikiibwè, dyàmbedi, ne àkwamè mamuma, àdi àkumbanyina kanyinganyinga, bwà kuleeja ne ùdi mu dyumvwangana ne Nzambi.

120 Bàdi bàtwàla maalu àà jazz ku cibumbà cyà ku cyambilu. Bàdi bàtwàla nyiishilù wa cyena Hollywood, udi ubàlakana, too ne ku cibumbà cyà ku cyambilu.

121 Mòna's, ncivwakù nsanganyiibwa mu cimenga cyènu cilengele emu, kùkaadi ndambù wa mbingu, mu Louisville, mu Kentucky anyi? Mwoyi wanyi kucibuluka, pàvwàbo bònso basòmbe mwaba awu, bajinga kumòna bishimà byà Nzambi; kàdi paùdi ànu ne wayiishi Èvànjeeliyò, mbafwànyine kuula tengetenge, mu katanci aka anyi, bàkùdimuka ne bàpàtuka mu nzùbu. Ncyà bushùwà menemene. Kabèèna naaCi bwalu to. Myoyi yàbò mmipapisha. Bàpàtuka; ne bààbúngì bàà kùdibo, beena Mishòònyì, kàbidì, bàtù bàya ku maèkèleeziyà à Mishòònyì abu. Kàdi bàvwa bùjiiibwe. . .batàmbe kùjiiibwa ne dibàlakana ne bikwàbò byònsò byà mùshindù awu abi, byà budingidingi ne bwena èkèleeziyà abi, kabàyi bamanyè kantu nànsha kàmwè pa bwalu bwà Nyumà wa Nzambi udi ne mwoyi to. "Biikàle ne mmwènekeli wa difwàna dyà Nzambi, kàdi bàvila Bukolè bwàdì."

Nditùkù kaayi ditùdi ne mwoyi edi. Tàngilàayi mwaba ùdibi byungwilè.

122 Yèhoshàfàtà kwambayè ne: "Ndi mumanyè, Aakàbà. Aba mbayiishi bèèbè nkàmà yinaayi. Mbalùmyàna bàà bàmwèka bònso bìmpè, yònsò wa kùdibo mulwàte ne nsuki yàbò misaamuna bìmpè menemene, ne bikwàbò byònsò, cikwàbò kàbidì cidibo mwà kwikala aci. Bàvwa mwà kwikala ne dipolomà dyàbò dyà D.D. Bàvwa mwà kwikala ne mapòlomà àbò à mìshindù yònsò. Bàdi mwà kwikala bamanyè Mifundu, kuumukila ku A too ne ku Z. Kàdi kanwènakù ne mukwàbò kàbidì, mwaba kampànda anyi? Kàkwènakù ànu mukwàbò umwepelè, mwaba kampànda anyi?"

123 Yèyè ne: "Èyowà, kùdi mukwàbò, kadi mèmè ntu mumukine." Ki bwalu mbwòbù abu's. Ki bwalu mbwòbù abu's. "Mèmè ntu mumukine." Vùlukàayi ne, Aakàbà ùvwa muntu mutèndeledi, ne aba bàvwa balongeshi batèndeledi, kadi bààkakina muntu ewu uvwa ne Bulelèla awu. Kwambayè ne: "Ntu mumukine." Wamba ne: "Yèyè ùtu misangu yònsò wamba

ànu maalu àndwisha.” Mmunyi mùvwàye mwà kudikanda bwà kucyènza, pàvwà Díyi dyà Nzambi dimupishié?

¹²⁴ Mmunyi muwàshàala mupùwe pawikalà mulùme wa Nzambi, anyi mukàji wa Nzambi, kàbìdì mumanyè ne mumòne mpèkaatù ne bikwàbò, byungwile mushiki ne myediibwè ku cipimu, ne bintu byònsò mùshindù awu; ne mumòne mùyaayà misùukà yà bantu mu ifernò; miliyò ku ditùkù; kàdì kushàala mupùwe anyi? Kwèna mwà kwenza nànkù to.

Muntu kampànda wàkangambila ditùkù adi, wàmba ne: “Udi wela meeji ne udi mwà kuciimanyika anyi?”

¹²⁵ Mémè ne: “To. Ncyèna mwà kuciimanyika to, bwalu Nzambi ngudi mwàmbe. Kàdì dîngà ditùkù, ku Cibàsà cyà Cilumbulwidi, nebàkoke cimwènyi cinène, kuteemeshila tulòndò dyàmwàmwa, ne mukàbà wà mèyi awu newèdiibwè. Nènku nengüimanè bwà kuwütèleja; ndi muswè kuumvwa mùdì díyi dyànyi didimwisha bantu bwà cyòci. Nzambi neàndumbùlwishè díbà díikalà díyi dyànyi dikaadi dicilwisha.” Èyowà, mukalenge. Pàtùdì tutàngila mwoyi ewu, lukòngò elu, lwenzuluka cyàkàbìdì ku cilumbulwidi kwàkà. Ncyà bushùwà. Tudi ne mwoyi mu cikondo cyà cikwàcisha bwòwà. Ne ki cyòci aci.

Nènku tudi tumumòna wènza...wàkamba ne: “Kùdikù mukwàbò kàbìdì anyi?”

¹²⁶ Yèyè ne: “Èyowà, kàdì mémè ntu mumukine, bwalu yèyè ùtu misangu yònsò ànu wàmba bipròfètà bibi bwànyi mémè.”

¹²⁷ Mmunyi mùdiye mwà kudikànda bwà kuyiisha bintu byùme ncyoncyoncyo abi, pàdiye ùbimòna byènzeka ànu kwenzeka? Kumòna Aakàbà ne nsombèlu ùvwàye ùsòmba ne wènza maalu mùvwaye wènza awu, ne kufikisha bantu mu mùshindù ùdìbo awu.

¹²⁸ Mmunyi mùdì mulùme wa Nzambi, anyi mukàji wa Nzambi, mwà kudikànda bwà kusingila ne kutàndisha mpèkaatù yà ku nseke yònsò? Mpàdìbi ne, mbamòne bayiishi bàà civùmvù, ne bàbàlakaji, ne balongeshi, ne bikwàbò mùshindù awu, bàlekela bantu bàya mu ifernò, ku miliyò, mu mashimi; bààbúngì... nànsha mu bantu bàà cijila. Ncyèna ngàakula nangànangà bwà ba-Méthodistes ne ba-Baptistes, ne bintu byà mùshindù awu; bàdì maalu awu, bòbò pààbò. Kàdì cidì ànu mmunda mwà milongo yènù emu.

¹²⁹ Ekèlekèle, bàlwa ku cibumbà cyà ku cyambilu, ne mmwenekelu wa bikwàbò byònsò kàdì kàyi wa beana Kilistò to, bènza maalu bu bikwàbò byònsò ebi, mu matungà ne bikwàbò, díbà adi bàdì bàcibùkila ne “ntèndeleeleu.” Ntèndeleeleu kampànda, kàdì cidì ntàntà mule be ne lupàndu lwà Mukalenge. Ncyà bushùwà. Bàdì ànu bàfikisha bantu ku musumbà munène wà bantu basaluja. Pashiishe pàdì disaluja adi dipita, díbà adi, katanci aka anyi, kwènakù mwà kusangana umwe wàbò nànsha; èkèleeziyà mmushàale munda mutupù. Mwanèètù, muntu yèyè

munangè Nzambi, newújè nkwasà wendè mu èkèleeziyà, musangu wònsò. Kéna mwà kushààla kule ne èkèleeziyà to. Neyà bushùwà.

¹³⁰ Mpindyewu mònaayi, ànu tusunsa tukesè cyanààna. Nentètè bwà kwambuluja, nye buludi ku cyena bwalu mpindyewu, bwalu díbà dyànyì dìdì dyènda diya.

Mònaayi, pashiishe kwambayè ne: “Kakwènakù mukwàbò nànsha umwe anyì?”

¹³¹ E kwambayè ne: “Èyowà, kàdi ntu mumukine. Ûtu ùngambila méyì à cipròfetà ànu mabì. Ûtu ùngamba ànu bintu bibì.”

“Èyowà,” kwambayè ne: “ndààyi nùkàmulondè.”

Kwambayè ne: “Dìna dyèndè m’Miikà.”

¹³² Kàdi muntu ewu ùvwa ne ntèndeleelelu búngì bukùmbàne bwà kumanya ne bantu aba kabàvwa babingè to.

¹³³ Ne muntu kanà yònsò ukààdikù mulengìibwè awu, nànsha kakesè, kùdì Nyumà wa Nzambi, mmumanyè ne bintu ebi, bìdì bìbìikidiibwa ne mbwena Kilistò leelù ewu ebi, kí mbyà cyà bushùwà to. “Kwèna mwà kunanga maalù à pa buloba, anyì bintu byà pa buloba to. Wèwè mwenzè nàнку, dinanga dyà Nzambi kadyèna munda mwèbè to.” Bible ngudi mwámbe nàнку.

Mpindyewu tàngilààyi. Wàkamba ne: “Ndààyi nùkamwàngàte.” Ki kuyabò kuntwaku.

¹³⁴ Ki pashiishe kutùmaye mùsànjeelà mukesè wa kale kuntwaku, mulami wa èkèleeziyà, pàmwàpa, anyì muntu kampànda, kuyayè kuntwaku e kwamba ne: “Mpindyewu tàngilà, Miikà, netùkakufikishe mwab’ewu kumpàla kwà Aakàbà ne Yèhoshàfàtà. Mpindyewu, bùbìdì bwàbò mbasòmbe pambèlù pààpa, ne mbantu banène mpindyewu. Mbalongeshi ne mbamanyì bàà mabàla. Ne bààkapeta dipolome dyàbò, ne bikwàbò. Ne yònsò wa ku sèminèrè wètù, yònsò wa ku èkèleeziyà yetù mwaba ewu, yidi mu dipetangana ne eci ndiswa dyà Nzambi. Mpindyewu, wèwè ambà cintu cyà momùmwe cidìbò bàmbè aci, nènku, nyèwù nkwabwila, neùlwatè bilàmbà bìmpè ne newèndelè mu kàshinyì kàà Cadillac. Ndi nkwabwila ne, newikalè ànu muntu munène bu wèwè mwà kwenza nàнку. Èyowà’s, mukalenge. Neùtantè.”

¹³⁵ Miika kwambayè ne: “Ànu mùdì Mukalenge Nzambi ne mwoyi amu, nèngàmbè ànu cidì Nzambi wàmba.” Amen. Èyowà. Kaa, awu’s ke muntu wa pa mwoyi wànyì. “Ndi mwà kwenzejiibwa bwà kudyà dyàmpà ne kunwà màyì,” mùvwàye mucyenzè amu, “bwà dyenza dya bwalu ebu.” Ûdi mwà kutuciibwa dipì ku ditàma dìmwè ne ku dikwàbò, ne bikwàbò kàbìdì, kàdi wàkamba Bulelèlè ne kushààla naabò. Nzambi

wàkashindika ne m'Bulelèlà. Kàvwa mwanyishiibwe bikolè to, kàdi ùvwa mumanyè Nzambi.

¹³⁶ Kutwàlabò Miikà mukesè mununu awu mwaba awu. E kwambayè ne: “Bimpè, Miikà, udi wamba bìshi bwà bwalu ebu?”

¹³⁷ Yèyè ne: “Bànda. Bànda.” Yèyè ne: “Bànda, mu ditalala. Tùngunuka, lubùlukà, ki cìndi muswè bwà wèwè kwenza ncyôci aci. Kàdi ndi mumòna Izalèlèlà bu mikòòkò, kayiyi mulami wa mikòòkò to, pa kakùnà kampànda, mitangàlàke. Ki cyôci aci,” mwàkambàye.

¹³⁸ Nènku mmwenzè ànu wènza mùshindù awu; ki Aakàbà kukùdimuka e kutàngila kùdì Yèhoshàfàtà, kwambayè ne: “Mvwa mukwambila cinyi? Munsantu mubùnguluki wa mu malaba awu...” anyi, cinyi, mfwilaayiku luse, anyi, cyònsò civwàku aci; mulùmyànà awu kwambayè ne: “Aci’s... Cingàkwambidì ncinyi? Mulùmyànà awu ùtu ùngambila cipròfètà ànu cyà cibì—cyà cibì bwànyì mèmè. Cìmvwa mukwambila ncinyi? ‘Cyèndè civwa mwa kwikala ànu kupiisha èkèleeziyà wetù, ne kupiisha bambi bèètù, ne kupiisha wètù mùshindù wà ntèndeleeu.’ Mvwa mukwambila ncinyi? Ùvwa ànu ne cyà kucyàmba. Ndi mumumanyè. Mvwa mumanyè papa wèndè kumpàla kwèndè.” Amen. “Mvwa mumanyè papa wèndè kumpàla kwèndè.” Uh-huh, èyowà’s, mukalenge, muntu mulelèlà wa Nzambi. Yèyè ne: “Mvwa mumanyè ne ùvwa mwà kwamba nànkù.”

¹³⁹ Ki pashiishe kwambayè ne: “Èyowà,” yèyè ne: “Mèmè kumòna Izalèlèlà bu mikòòkò, mitangàlàke, kayiyi ne mulami wa mikòòkò to, pa kakùnà kampànda.” Ki pashiishe kwambayè ne: “Ndi mu-...”

¹⁴⁰ Ke pashiishe umwe wa ku balùmyànà abu uvwa ne nsèngù minène awu, uvwa ne cyà kusàka naayi awu, muiyishi, kupàtukayè e kupulumunayè Miikà mukesè ewu ku luseke, kàdi kumutàpa dipi mu mbàngà ne bukolè bwèndè bwònsò, wàmba ne: “Njila kaayi uvwa Nyumà wa Nzambi Muiyilè bwà kupàtùka mu mèmè? Ne udi mumanyè.”

¹⁴¹ Kwambayè, yèyè ne: “Indilà too ne pawikale musòmba mu bùlokò emu, kàdi wèwè kushiisha kumanya njila udi Yè muiyilè.” Neyà bushùwà.

¹⁴² Indilà too ne pààsòmba Russie muneemu, kukwàta matùnga ne bikwàbo mùshindù awu, ne ditùnga edi, ànu bwà ditwà dyàdì dyà cìmpingà, nènku nenùmonè civwà cìmpè ne civwà cibì. Neyà bushùwà. Neùmonè ntèndeleeu webè wa civùmvù awu ní wàkufuta, anyi kààkukufuta.

¹⁴³ Ditùnga edi dídile mwadi, kí nkuseka anyi kwela bilèlè to. Ditùngà edi dìye ku binù, mu kanyinganyinga. Ki cìdì cìtùkèngelà ncyôci aci. Kí nditàbuluja dyà kubweja bantu bààbùngì mu èkèleeziyà nànsha. Bìdì bitùkèngela kukànga cinwinyi cyà maalà cyònsò, kwimanyika dinwà dyònsò dyà

mfwankà, kuupula matanda. Kutwàdija cibilù cyà Nyumà Mwimpè, cilelèlà, cyà cyena-kale; mwikalà balùme ne bakàji, munyà ne butùkù, batwè mpàla yàbò panshi, munkaci mwà kudila mwadi. Ndi nzwàmbila ne, neciikalè cisokomenu mu mvità cyà citàmba bunène cikaàdiku ditunga edi dipete kacya. Mbulelèlà.

144 Branham Tabernacle àlekelè budingidingi bwèndè abu. Àlukilè apa ku cyoshelu ne àdilongòlòlè ne Nzambi. Kwakajangana ne beena mutumba, ne bikwàbò mùshindù awu, ne kudilongolola ne Nzambi. Kanwàkwikala kàbìdi ne matàndu ne makòkyanganyi; neciikalè mwaba wa buloba bujimà bukuupukila mbimbibi. Ncyà bushùwà. Mpindyewu, aci mbulelèlà.

145 Ki pashiishe kwambayè ne: “Nnjila kaayi udi Nyumà wa Nzambi mupàtùkile munda mwànyi?”

146 Ki Miikà kwambayè ne: “Ndi mumòne Nzambi, ne cilwilu Cyendè, nsangilu Wendè, musòmbe mu Butùmbi.”

147 Nudi bamanyè’s, Nzambi ùtu wènza cisangilu Muulu mwàmwa, ku musangu ne ku musangu. Udi—Udi ùbikidisha Bèndè—Banjelo Bèndè ne wènza ci—cisangilu, ku musangu ne ku musangu, mu Dyulu mwàmwa.

148 Ki yèyè ne: “Ndi muMumòne musòmbe pa Nkwasa wa butùmbi, ne bantu bònsò bàvwa biimàne ku dyàbalùme ne ku dyà bakàji Dyèndè.” Ki yèyè ne: “Bàvwa bàyikilangana ne: ‘Nganyi ùtùdi mwà kutùma àpwekè àkaseeswishè Aakàbà, bwà àpàtuke àye kuntu kwàka bwà kukùmbaja cipròfetà cyà Eliyà? Nzambi mmùmanè kwamba nàнку, cìvwà mwà kwenzeka ncinyi, pa nàнку netùmone ne nganyi udi mwà kupweka.’

149 “Kàdi ke nyumà wa mashimi kubàndayè ùmukila mwinshì,” mu bushùwà bwà bwalu, ùpàtukila mu ifèrnò, “kubàndayè kumpàla kwà Nzambi wàmba ne: ‘Nempwekè, ne nembwelè mu bayiishi abo ne kubenzeja bwà kwambabò cipròfetà cyà mashimi.’” Kaa, mùshindù mwine ùvwà aci cibàfiikisha munda’s. mùshindù mwine ùvwàci cibuumvwije bibi’s, cyà ne: “Bàakamba ne: ‘Nenye kuntwaku ne nkenzèjè bayiishi abu, yònsò wa kùdibo, bwà kwambabò cipròfetà cyà mashimi.’” E kupwekayè e kubwela mu bayiishi abo, e kutwàdijabo kwamba cipròfetà cyà mashimi.

150 Nènku, mwanèètù, Nzambi umweumwe awu ùdi ùkòòkesha pa Nkwasa wa butùmbi umweumwe awu leelù ewu. Ne nyumà wa mashimi umweumwe awu mmwenze cintu cimwècimwè aci leelù ewu, wàmba cipròfetà cyà mashimi.

151 Bààkatungunuka ne kwamba ne: “Ditalala, ditalala, ditalala,” paanyimà pàà Mvità yà Kumpàla yà Buloba bujimà.

152 Swàyi nnuleejè kwàkafùminaci. Mu Mvità yà Kumpàla yà Buloba bujimà, pàvwà France, kuntu kwàka, muumùke kùdi

Nzambì, mu Bidimu byàbò makumi citèemà byà Dipaala abi, ne kutwàdijabo . . .

153 Mpindyewu nendibwínke mu myandà yà mu nsòmbelu, pa nàнку shààlaayi bònso ànu basòmbè pòlàà bwà tusunsa tukesè cyanààna.

154 Tàngilàayi, kale wàwa, ku cibangidilu, mu France mwámwa, mmwòmò amu ki mwàkatwàdija binyangu ne bukooya dyàmbedi. Piikalàku kacya kwikàle nsangilu wa bukooyà pa buloba apa's, mmu Paris, mu France. Kàbidì nkàadi muyàayayemù misangu yàbúngì, kàdi's ki mwaba mubyàmùbyalè unkaadiku mumòne. Ne Londres, mu Angletterre kèna mwà kwepudiibwa to. Ne États-Unis mmubàtwe pèndè mu nyimà. Ncyà bushùwà. Ki bóbò abu.

155 Musangu wònsò wùdì unyanga nsòmbelu mulenga wa bukàjì awu, udi unyanga mwongo wà ditùnga.

156 Paùyaayàku, mu matùngà àbò amu, kàdi wamba ne udi mpàndànjilà, bóbò kì mbaswè. . . Bamba ne: "Ciwùlwalwà kutwàmbila bwà twètù kwenza ncinyi, mmùshindù wà twètù kwimbila bakàjì bèètù misambu yà manyaanù, anyi bwà bânà bèètù bàà bakàjì? Udi ulwa kutwàmbila mùshindù wà twètù kushipa mabàkà ne bakàjì bèètù anyi? Kutùlongesha mùshindù wà twètù kunwà Wiski ne kulonda njila yitùdì tulonda eyi anyi?" Aci's ki citùdì twètù.

157 Tudi tudibìkila nkààyetù ditùngà dyà batèndeleeedi, ditùngà dyà beena Kilistò. Èè, bóbò "bampanganù" bàà mu Àfrikè abu s'bàdi mwà kutùlongesha maalu à mu nsombelu, mùshindù wà kusòmba mu bantu. Mwaba ùdì, pàmwè ne kwikala mutàmbe kubola, mu Étas-Unis, anyi, pa buloba, s'nditùnga edi, mùdidi dishàale emu. Mémè ndi mwena Àmèrikè, cyà bushùwà. Kàdi, mwanèètù, ncyèna ne cìndì mwà kwenza to, nànsha kumpàla kwà Aakàbà anyi Yèhoshàfàtà. . . Nènku bikèngela ngàmbè cidì Nzambì wàmba ne m'Bulelèlà. Aci's ke cidì èkèleeziyà ùkèngela bwà kulamata, leelù ewu. Byòbì bikèngela kusungula Nzambì anyi ditùnga, ànu Nzambì, misangu yònsò. Èyowà's, mukalenge.

158 Mònaayi, mu France, bàakatwàdija dibola dyàbò dyònsò adi, ne kutùngunuka mùshindù ùvwàbò bènda bàsòmbà kuntwaku awu. Ki pashiishe Nzambì kubàtùminayè Allemagne, bwà kubàbàngulayè ndambù. Pashiishe twètù kuya kuntwaku bwà kubàsungidila. Nènku tudi benzè ànu twenza nàнку, ne tucìmuna mvità, twipata beena Allemagne, twètù kupeta ditalala ne France, bàakapingana kùdì Nzambì anyi? To, mukalenge. Bakàjì, mvinyò, masandi, mpèkaatù ne bukooya too ne mu dibòdi.

159 Pashiishe cyàkenzàbo ncinyi? Cyàkenzekà ncinyi? Apa ke mwaba wàkabangilàye. Dyabùlù kwasaye cyèndè cimamwendè wa bukalenge muntwamu. Ki mwaba wàkabangilàye awu's,

ànu apu mene, bwà kukooyisha nsòmbelu wa bàà pa buloba, byùmukila mu Paris, mu France.

¹⁶⁰ Pashiishe, bu nwênù mwà kumòna, kàvwa mwà kubwela muneemu ku mudimu wà bwambi ewu to, pa nàнку cintu cyàkenzàye nkubwela mu Hollywood emu. Wàkajuula wendè Holl-...È kwasayè cyèndè cimamwendè wa bukalenge muneemu mu Hollywood. Dyabùlù kwikilayè muneemu, kùkaadi bidimu ndambù, kùkaadi bidimu dikumi ne bitaanu anyi makumi àbìdì, ne cilwilu cyèndè cinène, e kuyayè, kwikila mu Hollywood, mu Californie. Kàdi yèyè kubùcikila Étas-Unis ne makolè èndè à demon. Ncyà bushùwà. Myòdelè yètù yònsò yidi yifùmina ku Paris. Bàdi bayangata mu Hollywood, bàyiteeka pa bimwènenyi. Twànà twà bakàjì tukesè etu ne twànà twà balùme tukesè, ne bikwàbò, bàdi bàpàtuka mwaba ewu, bàdi bàbibandila ku bimwènenyi abi.

¹⁶¹ Twànà tukesè twìmpè, tulùmyànà tukesè tulenga, ncyèna ne cìndì mfwila naatù to. Nzambi àbèneshè myoyi yàtù mikèsè ayi. Mwoyi wànyì ùdi ùmata mashi bwà bwalu bwàtù.

¹⁶² Nènku ànu mu cimenga emu, mvwa nyiikilangana ne wanyi...umwe wa ku...mwanàanyi wa balùme, ditùkù adi. Yèyè ne: “Papa, bu ne kùvwa nsongàalùmè kampànda mwaba awu, mu cimenga amu, yìvwà ne Nyumà Mwìmpè,” ne bikwàbò. Udi ùdikonka ne mbwà cinyi mvwa nya mutàngile ku Denver, mu Colorado, anyi mwaba kampànda mùshindù awu? Kufikisha bàna bàanyi mwaba kampànda ùdi musumbà wà bantu bàdi bèèla mbilà kùdì Nzambi; kì citùdì tukèngela, mwanèètù.

¹⁶³ Ditùnga edi, cisàmbà eci, cimenga eci, mwaba ewu, mmushààle munyanguke maalù mu mùshindù wà ne bìdi byènza ne luse. Bu mèmè ànu mwà kwakula ànu mpindyewu cìndì mumanya menemene ne ncilelèlè ànu mwab'ewu, kì mbifwànyine nànsha kwikala byà kuleeja kumpàla kwà batèeleji basambàkàna to. Anyi, ànu muneemu mu cimenga cyètù twètù mene emu; kì ng'ànu muneemu to, kàdi mu myaba mikwàbò, myaba yònsò, mbibange kulwa ànu... .

¹⁶⁴ Bwà cinyi? Bantu...Tàngilàayi, balunda bàanyi, citàmbe kwikala ne budimu be. Mbilwè bipeepèle be, mu mùshindù wà ne cidi cikuvingila panshi. Dyabùlù úvwa ne ciibidilu cyà kwikalà mu myòdelè. Mmufwànyi kubènga kwikala mupàtùke mu myòdelè, kàdi kì mmupàtùke mu mudimu to, ke mèmè ùdi unwàmbila aci awu. Úcidi ànu mu mudimu.

¹⁶⁵ Tàngilàayi, leelù ewu. Tudi twangata, ànu mungàmbi katancì kakesè emu, bwà inábànza mutèkète, nsongàakàjì mukùlumpè mwikàle ne cilòngò cyà rose. Cileejilu, cilòngò cyà rose, ncilenga; cìdikù mbwà kwikala kucitàngila, ncyà bushùwà. Nènku aci ncyenze ànu bu èkèleeziyà, ùdikù bwà kwikalabò bàmutàngila. Bu mukàjì mulengèle, ùdikù bwà kwikalabò bàmutàngila. Ncyà bushùwà. Kàdi yèyè...Yèyè ùdi bimpè,

mbwena kwamba ne, ùdi mwímpè kùdi bàyendè, yéyè—yéyè ùdi bímpè. Kàdi yéyè kàyì ne mwelè wà mvità mupátula wà nsòmbelu mulenga bwà kumulamawù to, ùdi ùshààla cipùmbishi mu bantu ne kùdi bantu; ùdi ùshààla wa ciipanshì ne wa cilèndwishi ne mubolè mu mùshindù wà ne nànsha mbwa miinë kayiyi mwà kumutàngila to. Ncyà bushùwà.

¹⁶⁶ Nènku ncintu cimwècimwè aci kùdi Èkèleeziyà wa Nzambi udi ne mwoyi. Bàdi bàpátuka mwab'ewu ne bàteeta kubàlakana ne kudilongolola, kàdi kwenza maalu bu mùdi. . . Bàdi bàvùulamù bakàji bààbò bilàmbà, ànu. . . kàdi bantu kí mbamanyè ne badémons bàdi munkaci mwà kubùcikila nzùbu yàbò to.

¹⁶⁷ Ànu ku mutumba kwànyì ditùkù dikwàbò, inàbànza mutekète kampànda, ùndi ngèela meeji ne mmukàji mulenga, kàbìdi mmukàji musèla, ùdi ne mwànà, ki mukàji mutekète awu kupàtukayè mwaba awu, balùme bapweka ne njila batàngile ku mudimu kampànda, kàdi inàbànza mukesè ewu ùvwa mupàtuke pambèlù apu ne tulàmbà tukesè twà kale pambidi, byènza ne bwôwà.

¹⁶⁸ Ewu's mmuyiiki wà wènza bwôwà wà mu Ditùkù dyà Maamù, kàdi, mwanèètù wanyi, lekèla nkwambilè cintu kampànda: Maamù, àlukila bwà kwikala maamù kàbìdi!

¹⁶⁹ Too ne kànà kàà balùme kakesè kàvwà kalwè kusàmbangana ku beena mutumba bèètù aku, e kubwelakù kutwàmbila bwalu abu ne: “Tàngilàayi pambèlù pààpa.”

Mémè ne: “Èè, apu kapèèna cintu to.”

¹⁷⁰ Mukàji awu mmukàji mwímpè. Ncyèna ngàmbe ne mmupange nsòmbelu mulenga to. Kàdi, bwalu bùdiku mbwà ne, kùdi nyumà mubi, wa bukooyà pambidi pèndè, udi umwenzeja cyôci aci, kàdi yéyè kí mmucimanyè to.

¹⁷¹ Ncinyi cidi maamù mufwànyine kujingila pa buloba apa, anyì muntu kanà yònsò ewu, bwà kulwàta tulàmbà tukesè twà kale twà manyaanù, ne kudyànyika kumpàla kwà muntu mulùme? Udi mulengele, mwanèètù wa bakàji. Udi mulengele, maamù. Ndi nsàkidila Nzambi bwà bwalu bwèbè. Kàdi, udi mulengele, kàdi wèwè kùyì ne Nyumà Mwímpè bwà kulama nsòmbelu wa bukàlànga awu to, bivwa bitàmbe bwímpè bwà wèwè kwikala cibìcibi wa nkotòoto wa muntu kàyikù mwà kukutàngila to, kàdi kuya mu Dyulu. Ncyà bushùwà. Aci's ncilelèlè. Tàngilà ùmonè cyùdi wenza; maalu à nsòmbelu awu.

¹⁷² Mpindyewu, cidiku ncyà ne, dyabùlù mmubwelè e kwambilayè bantu bintu ebi. Mmubwelè mu bayiishi abu; ùdi ùtentula Hollywood. Bansongàakàji ne bainàbànza batekète, bàdi batentula Hollywood. Cintu citàmbe bwímpè ku bintu bìdìbo naabi mu ditùnga emu leelù, cyà cipangè nsòmbelu mulenga cyùdi mwà kutèeleja, nkwakula pa bintu kampànda; miyiiki yònsò yà ku tudyòmbe.

173 Mukàji kampànda mukùlàkàji bu Inàbànza Kay Star, ncyèna nendè bwalu to; kàdi pa kumòna ànu mukàji mukùlàkàji, wa bidimu makumi àtaanu, ne byònsò abi, ne bilàmbà byèndè byònsò bimwónyè ndèng, byènze bu nè bàvwa bamwèle mu mufuku wà bukula. Ncyèna ngamba aci bwà kwela bilèle to, bwalu ndi ngàakula ndyùla bintu abi. Kàdi mukàji wènza maalu mùshindù awu, kàdi kwimana kuulu kàdi kwikala cileeji lu cyà bakàji batekète bàà beena Àmèrikè, nkadiwù bwà ditùnga dyètù. Ndyabùlù.

174 Balùmyànà bu mùdi Arthur Godfrey ne bakwàbò bàdi bànyùnguluka mwab'ewu aba, bènza bintu bidibo bènza ebi, ne bantu bàà batàmbe kumanyika mu ditùnga bàà mùshindù awu, ne, mòna's, mbundù.

175 Àlèluuyàh! Ndi ngàmba aci bwalu ndi ngùmvwa ne Nyumà Mwimpè ùdi kaaba aka. Dibùcikila ki kwenzekadi eku, dyènda dikòmba ku nzùbu ne ku nzùbu, ku mwaba ne ku mwaba, ku èkèleeziyà ne ku èkèleeziyà, ku muntu ne ku muntu.

176 Bânà, mu Dînà dyà Yesù Kilistò, juukilaayi kuulu ne maalu mimpè à mu nsòmbelu mùshindàmee ne pa ditabuluja ne Mukalenge Yesù Kilistò, nwàmba ne: “Néndondè njila pàmwè ne banyàabanyà badyombola bàà Mukalenge.” Èyowà's, mukalenge. “Mémè nêngiikalè maamù mulelèlè.” “Mémè nêngiikalè papa mulelèlè.”

Pàmèngàbo kùdi buloba bujimà, ne
bònsò bàdi banyungùlùke, bònsò bàdi
banyungùlùkile musùkà wànyì baya,
Dìbà adi Yèyè ùdi ditèkemena dyànyì ne
cyeyemenu.

Bwalu pa Kilistò, Lubwebwe lushindàme,
mpàndi mwimane;
Myaba mikwàbò yònsò nduntekà,
Myaba mikwàbò yònsò . . .

177 Ncinyì cidi cilelè bintàkanyì byònsò ebi? Ncinyì cidi cifikishe bambi bwà kwenzabò mùshindù ewu? Ncinyì cidi cyenzèje bayiishi bwà kwambilabò bantu cipròfètà cyà mashimi?

178 Bwà cinyì byàkenzeka, kùkaadi bidimu, ne nwènù ba-Méthodistes . . . Dìbà divwà mukùlumpè John Smith mùlwè ku cyambilu eku mwambula, bwà kuyiisha Èvànjeeliyò, ne kuyiishaye diyiisha dyà katùpà dyà mèbà ànaayi. Ne kwambayè ne: “Lutàtù lùdiku ndwà ne, mwoyi wànyì wùdi wùcibuluka.” Yèyè kwamba ne: “Bânà bàà bakàji bàà ba-Méthodistes bàdi mene munkaci mwà kwela tukànu ku minu yàbò.”

179 Ne, leelù ewu, mbavwàle tùpùtulù ne tulàmbà twà kale twà manyaanù. Ne nebàshaalè butaka huluhulu, mu bidimu bikwàbò bitaanu kumpàla eku, piikala cintu kampànda kaciyì cyenjùbwe. Cidi cinwenzèkèle nwènù bayiishi bàà ba-Méthodistes, nwènù ba-Campbellites, nwènù ba-Baptistes

ncinyi? Èyowà, mukalenga. Ndyabùlù, udi mukùpe makolè èndè pashì, ne mmupàtùle tuunyumà twèndè tubi atu mwab'ewu.

¹⁸⁰ Kàdi kanwèna bacimanyè to, nwènu bàdi munkaci mwà kunwà mfwankà, nwènu bakàjì, ne nwenza maalu munùdi munkaci mwà kwenza amu, ne nunwà maalà ne nwenza maalu à macimbu mùshindù unùdi nwenza amu, kanwèna bamanyè ne nudi munkaci mwà kulùnga mubidi wènu awu, ne nubùtula nkòngu mijimà yànùlondà paanyimà ayi, pìikalàku cintu bu nàнку to. Byà pa lukàmà makumi mwandamukùlù ne bìtaanu bìdi ne mpùngà wa kupeta kànsèrè, ku dinwà dyà mfwankà, kàdi nwènu nudi nubwelamù ne budiswile bwònsò. Eku èkèleeziyà pààyì yìcìitaba.

¹⁸¹ Mu èkèleeziyà munène wa ba-Baptistes, anu mwaba ewu, àbìdi àdi pashì àà. . . Ndi ntuuta ba-Baptistes. Ndi ne bukenji bwà kwenza cyòci aci; bóbò bàdi ànu bu beeyèmène ku luseke lùndi mufùmìne. Kàdi pàvwàbo ne cyà kufila cipòòlù pankaci pàà mudimu wa kàlaasà kàà Dyàlumingu ne mudimu wà diyiisha, bwà ne mpaasàtà ne bònsò bààmònaku mwà kupàtuka bwà kanwà mfwankà, nènku mu mùsèèsù amu mùvwa balùme ne bakàjì bèlè milongo munkaci mwà dinwa mfwankà. Dyabùlù ngudi mwenze cyòci aci. Ncyà bushùwà.

¹⁸² Pashiishe, muneemu mu cimenga cyètù mene emu, umwe wa ku bambi bèètù bàà batàmbe kumanyika, ànu lwà mu New Albany emu, mu cyòci cipalu emu, ke mùdi umwe wa ku bambi bèètù bàà batàmbe kumanyika bàà mu cimenga emu ùlombwela ndongamu wa maja à bisumbù cyà balumè ne bakàjì bàja bàkwàtangana pambidi, bwà kubàndisha balùme ne bakàjì ku bibumbà byà ku cyambilu.

¹⁸³ Kanùcyùkiku cìdi bàà pa buloba bàmba to, ncyènà ncyùka mùshindù unùdi nuteeta bwà kulòbeshanganyinakù amu to; mwanèètù, kakwèna mulùme wetù wa mbidi tumatuma ewu ùpukila mukàjì wa mulùme mukwàbò, kàdi kàyì ùmvwa mbidi ùmuvwayila to. Nudi bamanyè ne aci mbulelèlà.

¹⁸⁴ Mbangàte bakàjì bèètù, babàvùùle bilàmbà; mu bìrò byàbò amu, ne bènda bèndesha taxi, bàbànda bàpweka ne mùsèèsù. Pààbù, bàvwa ne cyà kwikala kumbèlu, paanyimà pàà mbàbùlù, munkaci mwà kulàmbà, ne kulongolola byàkudyà byà mundaamunya.

¹⁸⁵ Ncinyi aci? Ndyabùlù. Dibùcikila nditwàdije. Ncyènà ngàmba cintu nànsha cimwè bwà muntu nkààyà ewu anyi bwà muntu nkààyà wàwa to. Ndi ngàmba ne nyumà yà bukooyà yidi mikwàte bantu, yibàbweja ànu mu cyòci aci. Dibùcikila dyà États-Unis.

¹⁸⁶ Nditònkoka dyà èkèleeziyà. Èkèleeziyà mmutònkola kùdi dyabùlù. Kale wàwa. . .

¹⁸⁷ Bàdi bàngata nsongàalùmè mpindyewu, pàdiye ufika mu sèminèrè, cintu cyà kumpàla cidiye ne cyà kulonga nkwanji kupeta dipòlomè dyèndè. Ûdi ne cyà kulonga maalu à mùdì kusòmba. Ûdi ne cyà kulonga tèòlòji. Ûdi ne cyà kulongesha, kupeta malongesha à mishindù yònsò mamufinyika munda mwèndè. Pìikalàye kàyì mupetè nkolèshèlu mulelèlà mulengèle, yèyè kàyì wa meeji matwe ne lungènyi lutwè mùdiye mwà kwikala to, dībà adi nebàmwipàtè; kènà mwà kukùmbana to. Ncinyi cidiye ne cyà kwenza? Nkupàtuka mwab'ewu, kuya kenza bu muyiiki mukesè wà cidìidì, muyiiki wà cidìidì wà mu èkèleeziyà, kùdì musùmbà wà bantu, musùmbà wà balùme ne bakàji biikàle bapùnga ne lufù.

¹⁸⁸ Èyi Nzambì, tütùmineku bantu kampànda bàà cyena-kale, bakàyàbàle bàdi kabàyì bamanye mwà kusunguluja A ne B to, bàdi bamanyè bukolè bwà dibìikà dyà ku lufù dyà Mukalenge Yesù Kilistò, bìikala mwà kuyiisha kanyinganyinga, ne kutùma balùme ne bakàji ku cyoshelu, bwà kunanga Mukalenge Yesù. [Katùpà kàà mukàbà wà mèyi munda mutupù—Muf.]

¹⁸⁹ Nkadìwu. Mmubùcikile ma-sèminèrè. Mmubùcikile maèkèleeziyà. Mmuvùule bakàji bèètù bilàmbà. Mmufikishe balùme bèètù mu mùshindù wà kùyì mwà kubàmbilaku cintu to. Ne balùme ne bakàji, ngèèla meeji. . .

¹⁹⁰ Wèwè udi wamba ne: “Èè, bakàji abu.” Èyowà, ne nwènù balùme bàànyishila bakàji bèènù bwà kwenzabò aci, aci cidi cileeja cinùdì. Aci's ncyôci menemene. Ncyà bushùwà menemene. Mbundù. Byènza luse be.

¹⁹¹ Ne pashìshe too ne kùdì muyiishi. Muyiishi awu mmwimàne pa cibùmbà cyà ku cyambilu, leelù ewu, cyà cyambilu cyà cyena-leelù. Mwimàne mwaba awu, ne bantu bèndè kumpàla kwèndè, kàdi kuyiisha bwà kantu ne kantu kònsò kakesè kàà kale kàà pa buloba aku pa kuumusha kanyinganyinga ne mpèkaatù, ne nkùrusè mukàyàbàle wa Kilistò awu. Èyowà.

¹⁹² Paùdì utèèka butelèlèlà panshì; bantu nebàlwe kukutèèleja, mu mudimu wa butangadiki. Udi uteeta kufika ku kiipàcilà ne kuyiisha Èvànjeeliyò, kufikisha bantu ku dinyingalala ne kubààkaja. Nebàjuuke e kupàtukabò, kì mbenzèjìibwa bwa kuMutèèleja to. To, kì mbenzèjìibwa to. Kàdi, bânà bèètù, nebìikalè ne cyà kunyingalala anyi kubùtuka.

¹⁹³ Badémòns! Nuyààya mu cilongelu; mmubùcikile bilongelu. Kènzakanàayi, mu ditùnga leelù ewu. Tàngilàayi kunweku, nwènù balùmyànà, nwènù beena Mishònyì. Tàngilàayi, kùdì bilongelu binène binaayi byà Kàtòlikè ne bikwàbò, bìdì biibaka leelù ewu. Mbwà cinyi bìdì nànkù? Nudi munkaci mwà kuumusha bimanu byà mikàlu.

¹⁹⁴ Ncyènà ne cìndì mfwila ne bwena Kàtòlikè to, nànsha mùndì ncyì mbwìtabuuja amu. Mémè ndi mwena Mishònyì wa muumìshe maalu ncyóng. Ncyà bushùwà menemene. Nudikù

mwà kujaadika ne kabèèna... Kanwèna mwà kukòkangana naabò to. Bòbò bàdi bàmba ne: “Twétù katwèna tucyùka cidi Bible wàmba to. Tudi bamanyè cidi èkèleeziyà wàmba aci.”

¹⁹⁵ Nzambi ùdi mu Dìyì Dyèndè. *Ewu* ki mwaba ùdi Nzambi ùsanganyibwa.

¹⁹⁶ Kàdi bàmwè bàà ku beena Kàtòlikè, mbalamàte ku èkèleeziyà wabò, mbafwànyine kukufwisha bundù, wèwè bu mwena Mishòònyì. Bu wèwè mwà kulamatakù ànu ku Bible, bu mùdibo bàlamata ku èkèleeziyà wabò amu. Mbîmpè. Kàdi, mbapiile. Ndi mwà kwamba cyôci aci ku bukòokeshi bwà Nzambi wa Bukolè bwònsò, ne, bòbò mbapiile. Kakuyì mpatà nànsha.

¹⁹⁷ Ne nwènù beena Mishòònyì pèènu nudi bapiile, mùshindù unùdi nwenza maalu, bwalu's nudi bamanyè menemene cidi citàmbe bwîmpè, kàdi nudi nucyènza. Aci cidi cinùpàtula beena lubombo. Ncyà bushùwà, ndibùcikila; maèkèleeziyà mmuumùshe mikàlu. Kàdi mpindyewu pamutù pàà. . .

¹⁹⁸ Èkèleeziyà, ùteeta bwà kuvwija èkèleeziyà mulenga, kwibaka èkèleeziyà mutàmbe bunène, kwasapù miketa minène, bisanji binène byà orgues ne kupeta cintu ne cintu cyònsò bàteeta kutentula èkèleeziyà wa Kàtòlikè. Nwènù kabyèna binùkèngela bwà kutentula èkèleeziyà wa Kàtòlikè nànsha, piikalàye mulongolwela dibùtuka. Bwalu, aci ng'EMU MÛDÌ MUKALENGA WÀMBA, mmulongolwela diya dyà mu dibùtuka. Kàdi mwine awu ke unùdi nutentula, nuyààya nendè.

¹⁹⁹ Kàdi citùdi tukèngela leelù ewu, ki ng'èkèleeziyà munène to, muketa munène to, mbyoshelu byà cyena-kale bìdi mpèkaatù yòshibwapù yibùtudiibwa, mu masambila malàmbula à kùdi balume ne bakàji bàdi banangè Mukalenge Yesù Kilistò. Nudi bamanyè aci. Ki cidi citùkèngelà ncyôci aci. ntèèlèjaayi, nwènù balundà bàànyì. Ntèèlèjaayi. Ndinanga.

²⁰⁰ Dìbà dyànyì dyayi. Mvw'a kujinga ànu kujèmbeleelapù, mwaba awu, ànu, nencyangàte, ànu pashiishe ndambu, dibùcikila adi, kùdidi dikafikè. Ndibùcikile. Ndibùcikile matùngà ètù. Ndibùcikile Étas-Unis.

²⁰¹ Mpindyewu vùlukàayi ne, kacya ncitu mwéle kakàndà kacya bàndela, nwamònu's, aci kî ncintu cyà kuditàmbishila to, awu's mmakenji ànyì à bwànàbutè à bwena Àmèrikè bwà mèmè muswè kucyènza. Kàdi balundà bàànyì bàdi ne musinga wàbùngì be kùndi, nciyi muswe kubàbwejamù to. Tàngilàayi, nkàadi mubàmòne bakabwelamù bu bantu bîmpè, bàmùpàtuka beena mucimà, nènku mèmè ncyèna muswè aci to.

²⁰² Ndi ne cintu cìmwèpelè. Ndi mwab'ewu munkacì mwà kwibaka cibùmbà cyà cyambilu bwà Muntu umwèpelè Udi Mufile mpàla, ne mwìnè awu n'Yesù Kilistò, ne ànu Yèyè nkààyendè. Ndi mMupèesha dìbà dyànyì. Ncyà bushùwà. Kàdi

bu mēmè mwà kululamija èkèleeziyà, aci necìtangile bwalu bwa bakwàbò bàà pa buloba. Ncyà bushùwà.

²⁰³ Kàdi lekèlaayi nnwambilè, pàvwà Mukalenge Roosevelt (Muntu awu ùkaadi mufwè, yikishe, ndi ngiitabuuja ne mmwikishe.), wàkabwela e kufila mpàla misangu yisàtù anyì yinaayi, ne kucìmunayè, ciine aci ànu mbangilu wa cimbàmbilà, ndi mwà kunujaadikilaci mu Mifùndu, mwaba wúmvwà mwambe ne necyènzekè. Ncyà bushùwà. Katùcyènà kàbìdì ne DĪyĪ dikùlù dyà ditùnga to, dikaadi dikòsolola tutùpàtutùpà, cintu cyònsò ncyenjiibwe ne mapeepeleji. Ba Républicains bàdi ànu babì, bintu abi mmànyì mu nkùnde nkùnde mu mànyì.

²⁰⁴ Bwalu bukalenge bwònsò nebùvingutudiibwè, kàdi Bukalenge bwà Yesù Kilstò nebwímanè tэндè ne neakokeshe kashidi. Ncyà bushùwà. Pa...Danyèlè ùmwènene dibwe dilamuna ku mikùnà, ne kukùmàdi maalu à cìdìdì awu ne kuàvinga kuàshiya lupwishi mùshindù awu, ànu bu mùdì blé pa cishipwidi mu movù wà luuyà. Kàdi Lubwebwe alu lwàkadyunda e kushààla mukùnà munène wàkaalabalà ku mu mau... wàkùja mau lu ne buloba. Ki bwalu mbwàbù's.

²⁰⁵ Maalu à cìdìdì mmamanè kujika. Ditùnga dyètù ndivingùtùke. Nwavùlukaayi aci, ne Mwanètù Branham mmwambè nànkù, EMU MMŪDĪ MUKALENGE WÀMBA. Ditùngà dyètù ndishimbùdìibwe. Kadyàdyàkujuukèè. Ndimanè kufwà, ànu bu mùdì matùnga makwàbò wònsò amu. Ndítùnga ditàmbe bunène pa buloba, dìdì ditwè makàsà panshi leelù ewu, kàdi ndimiinu dìmwendimwè dyà dyabùlù didì dikùnyìibwa mu myoyi yà bantu; mùshindù wàkabwelàdi mu Hollywood, mùshindù wàkapàtukàdi kubwela mu bantu, ne kubangila ku *cikampànda*. Kàdi kwèna mwà kubàmbila ní ncinyì ní ncinyì to.

²⁰⁶ Tèekaayimu ànu Mfumù wàteeta bwà kukàndika wiski, mpindyewu kàdi kwela mukàndu, nùmòne cìdì cifwànyine kwenzeka. Mbafwànyine kumwasa, mu mèbà àbìdì paanyimà pàà yèyè tumanè kubwelamù. Bushùwà, yèyè kèna mwà kucitwàla to; buloba bujimà bùdì bùmulwisha. Èyowà's, mukalenge. Kùvwa mwà kucyènza to.

²⁰⁷ Ndimane kufwà. Ndimana kubùcikila, ne nyumà wa communismè mmumanè kucimuna.

²⁰⁸ Ndàayi ku bilongelu byètù leelù ewu, tàngilàayi bàna bèètù bàà mu tùlaasà. Bàna bèètù bakesè bàyaaya mu tùlaasà, nuvwakù ne cyà kumanya bìdì byènzekamu. Twànà twà bakàjì tutekète kwìnshì eku mu bilongelu, ne bintu byà mùshindù awu, twà bidimu dikumi ne binaayi ne dikumi ne bitaanu, baamamwabò babàtùme mu cìlongelu, banyangùke mu nsòmbelu, mu meeji, bakwàciki bàà bintu byà lulengu, banù bàà dyamba, banù bàà mfwankà, bikwàbò byònsò mùshindù awu; baciikale ne bidimu bikesè menemene, bàna bakesè mùshindù awu. Mbifwànyine kwikala bikolè bwà kupeta mukàjì virgò

munkaci mwàbò ànu mùdìbì bifwànyine kwikala bikolè bwà kupeta kashingi mu mushiki wà bisonàsà, pàdìbò bàpatuka ne mbulankètè ne bânà bàà balùme, ne badyàdija ku mpengà kwà musùlù ne myaba mikwàbò yònsò.

209 Nènku ndi mwà kunùjaadikilaci, balunda bànyyi. Ncyèna mwà kucyàmbila mu cyambilu pàndi ncìyi mumanyè cìndi ngàmba to. Bwà bilongelu bidì mu byètù—byètù bitùpa byà malaba ebi, ànu mu bitùpa byètù byà malaba ebi, bwà mvwàdilu wa tuuinàbànza tukèsè etu, ncyèna mumanyè to. . .bàmbila baamamwàbò ne bàdi bàya mu myaba mishùlàngàne, kàdi bàkatwilangana ne bânà bàà balùme kàbìdi bàkenda too ne masandi mu mìsèèsù yà mu Louisville (Ncinyi aci?), wa bwalu bimba misambu mu kòralè.

210 Bwalu, bàdi ne Èvànjeeliyò wa buwetù mukesè wa kale mwimàne mwabwa awu, mùdi bayiishi biimàne ne bàakula bwà tuntu tukèsè katùyì ne musinga, ne tuumaalu-malonda tukèsè twà mu Bible, anyi cintu kampànda cyà mùshindù awu, pamutù pàà kuyiisha kanyinganyinga ne kutwàla balùme ne bakàji ku cyoshelu.

211 Papa wendè ùdi ùbwela butùkù ne ùtápisha cifwankà cyèndè, wàngata verre wa bière, ùsòmba panshi ne ùmunwà. Maamù mmupàtùke, mundaamunya, ne musùmbà wà bakàji nendè mu difestò kampànda dyà ditwà dyà kartà, byà mu nsòmbelu kampànda wa mùshindù awu. Mmunyi munùdi nutèkemena bwà mwànà kwikalayè cingà cintu?

212 Tàngilàayi, mu nyùngulukilu kanà yònsò mùdi musòmbèle, ke cyùdi.

213 Angàtà kànà kàà bakàji katekète, kànà kàà balùme katekète, ùbàtèèkè mwab'ewu, ùbàlekèlè bàsòmba ne muntu kampànda. Angàtà muntu mulùme, ndi mwà kwangata mwanàanyi wa balùme, kumulekela ùpàtuka ditùkù dijimà ne muntu kampànda; pàndi ngàalukila, ndi mwà kukwambila misangu yònsò muntu uvwayè nendè. Ncyà bushùwà menemene. Tàngilàayi, nyùngulukilu awu, nyumà awu ùdi ùmubàkùla.

214 Udi ubwela mu èkèleeziyà, mùdi bantu bònsò. . . udi ubwela mu èkèleeziyà wa Nyumà Mwîmpè, anyi—anyi èkèleeziyà yà beena Mpenta, mùdìbò bàyìbiikila amu. Bantu bònsò biikalè. . . Kaa, bàdi bànyeemakana banyukusha mutù bàtùma paanyimà bàtùma kumpàla, mpaasàta wenza nàнку awu; tàngilàayi mùdi èkèleeziyà mujimà awu ùbanga kwenza cintu cimwècimwè aci. Lekèlè bantu balùme, cisàmbà, bàjuuke ne—ne bènza maalu à macimbu àdi ènza bwòwà, anyi cintu kampànda cikwàbò; tàngilàayi cintu cyònsò cidi cìcyènza. Bwelàayi mu mwaba ùdi mpaasàta muumàkàne ne mukwàte mashika; tàngilàayi mùdi musùmbà wònsò awu ùcyènza. Udi ubwela mu nyùngulukilu awu.

215 Wèwè mwangàte muntu udi ne nsòmbèlu mulenga, kàdi lekèlè àkasèlè kakàjàànà kàà kale kàdi kakàyi ne musinga aku; kaabyàkunènga to bwà kwikalayè pèndè kàyi ne musinga. Ki cyàkenzekelà Aakàbà. Angàtàayi cìmwècìmwè aci, cyanza mwandamuna, lekèlaayi ànu mukàji mukesè mulengèle àsedibwè kùdi mulùme udi kàyi ne bujitu to; katanci aka anyi, mukàji awu ùdi wènza bintu bìmwèbìmwè bìdi mulùme awu wènza.

216 Mùshindù mwine ûndì mwà kuya, mu dindà emu, ne kufunkuna byanza byànyi ku nzùbu yìdi mifwè ne bintu byà mùshindù awu, mùdi bamaamù batekète bananga bàbwela kùdi papa kanwàyi, ne bintu byà mùshindù awu, bèèla meeji ne mbafwànyine kumwambulwisha, kadi mpindyewu byònsò bikaadi maamu awu ne bònsò mbadibwinke mu kunwà kwà maala bashidimbe. Bwàlu mbwà nyùngulukilu.

217 Ncinyi aci? Ndyabùlù. Ndyabùlù, dibùcikila. Mmudifindè mu ditunga edi, bu mùdi ntambwe ùkungula. Mmudisòmbèsha mùnwemu emu mu mwaba mutàmbe bwìmpè ùvwàbo naawù, mu Hollywood. Kwambayè ne: “Ndi mwà kwangata bindidimbi byà mu sendema too ne mwàlwà tèlèvisiyò, dîbà adi nembàkùle.” Ki kusòmbayè mwab’ewu.

218 Nèku bantu bàà mu èkèleeziyà, pamutù pàà kukàngabò sèndèma ne kukàndika bàna bààbò bwà kuyamù, bòbò bàdi bàbàpèèsha centimes dikumi mu dyàlumingu mu mapingaja ne bàbàtùma muntwamu, bwà bààmòna mwà kukatwàku kartà kàà bulundà, bàpàtuka nkààyabò bènda bànyùnguluka. Kaa, bundù kaayi’s. Mpindyewu bàdi ànu bàkàngula tèlèviziyò ne bàbandila bintu byònsò byà bukooya, byà macimbu bibolè bìdi pa buloba, ku cyòci aci. Ncyà bushùwà.

219 Mémè ncyèna ne bwalu ne sèndèma to. Ncyèna bwalu ne tèlèviziyò to. Bwalu mbwà cintu cibolè cidimu aci. Ki bwalu mbwòbò abu. Bu nwènù bacilama cikezuke, nunku ncishàala cikezuke.

220 Kwènà mwà kusùmbisha bisàbatà byà cyena-kale byà mbòta abi, leelù ewu, mu cimenga emu to, nànsha kakesè. Bakàji ki mbabìswè nànsha. Mbaswè byà twànà twà nkàsà tupàtùkemù abi. Bakàji bàkwàbò bònsò bàdi bènza aci. Ncyà bushùwà.

221 Paùdi uya mu èkèleeziyà, kwèna mwà kubàsùmbisha ntèndeleeleu wa kale awu to, bwalu, mukàji mukwàbò awu, ki mmuswè to, to, kènà naabi bwalu to. To, mukalenge. “Mémè ncyèna dijina ne kuya kuntwaku to. Ndi ànu ngiitabuujà, ke cyònsò cìdiku.” Kaa, mwanèètù, dyabùlù ùtu wìtabuujà, pèndè. Mmwòmò. Neùnyingalalè anyi udi ubùtuka.

222 Mpindyewu, mfwilaayiku luse; to, ncyèna ndòmba luse to. To, ncyèna ndòmba luse to. To, ngùmushì dilòmba dyà luse adi. Ntu munangè bantu. Kàdi ndi—ndi—ndi—ndi mutamba kunùnanga bwà kunùmòna nukadiinamù ne mitù miinyika

mùshindù awu. Bu Nzambi mwà kuswà, nempinganyinèpu pashiishe ndambu mu lumingu emu.

223 Mpindyewu, kunùdì nwènù baamaamù bàdì baamaamù, ànu díyì òm̀wèpèlè cyanaànà bwènù nwènù kumpàla kwà kuya. Nzambi ànùbènèshe. Kolèshaayi bânà bèènù mu mushindu mujalàme.

224 Netwàngatululè dibùcikila edi; tucìdi ne cyà kubwela naaci too ne mu mbànzà, ne myaba yàbùngì, bilongelu, ne kuya naaci mu myaba yàbùngì. Netùcyangàtùlùle.

225 Kàdi, dibùcikila dyà États-Unis, dyabùlù mmumucimùne. Kanùciinyi Russie to. Russie kènà ne bwalu to. Tudi tudyènzèlaci twètù nkààyetù, dibola dyètù nkààyetù ànu munkaci mwètù mene. Ncyà bushùwà.

226 Nudi bamanyè ne, États-Unis ùdi ne difwà dyà mabàkà kutàmba matùnga ónsò à pa buloba anyi? Difwà dyà mabàkà dipite búngì; elààyi meeji pa bwalu ebu. Kabyèna byènza bwòwa anyi? Buumaamù mbufwè. Baamaamù kabàcyèna bàshààla kàbìdì kumbèlu ne bânà bààbò balela, mùvwàbì pa cìibidilu amu to. Bìdi bìbàkèngela kwikalabò ne mudimu.

227 Munwemu ditùkù adi, muntu kampànda musùmbishi wa byàkudyà mu cimenga emu, nguvwa undondela bwalu abu. Bakàjì bàdì bènza mudimu mu byapù binène ebi, bakàjì basèla batekète aba ne musùmbà wà bânà bakesè. Bàdi ne bandeeji bàdi bàkòwelela bânà bààbò bàà mu mabòko. Bàdi bènza midimu mu byapù ebi. Yèyè ne: “Kùvwa bàbìdì bààbò biimàne kuntwaku, pàvwàbò biipàcìibwe, mu cyapù cyàbò amu, kwambabo ne: ‘Kùtácishi meeji to. Netùditàmbàkèènè, nànsha bìshi.’”

228 Kaa, díba dyà bundumbà didìku edi. Mmwómò. Dyabùlù mmubambile bulelèlè ne bóbò mbamfùmù bàà nzùbu. Nebàdikèbèle mfranga yàbò yà sungasunga. Nebènzè cìdìbo bàjinga kwenza aci. Kàdi teetàku bwà kubàtùla ku cyòci aci túng, ní wafùdisha’s.

229 Kùdi cintu ànu cìmwèpèlè cìdì mwà kucipàtula munda mwàbò, ncyoshelu, kumpàlâ kwà Yesù Kilistò, ntèndeleeleu wa cyena-kale, wa binsònji bipweka wìkala mwà kupanda myoyi yàbò ne kuyisunsulula tupese tupese, ne kubènza cìdìbo ne cyà kwìkala. Ncyà bushùwà.

230 Bàdi mwà kwela meeji ne ndi mununu wa meeji à cyena kale. Kàdi ditùkù diwìkala upùnga ne lufù, mwanèètù wa balùme, mwanèètù wa bakàjì, neumanyè ne mwawa munwàmbile Bulelèlè. Ncyà bushùwà.

231 Dibùcikila, dìdi dilwa, díbà dikaadi dikùmbàne. Mpindyewu, mpindyewu, èyowà, díbà dyà dipàngadika, kàbìdì, díbà dyà dipàngadika, ki ndyà kulwa mu èkèleeziyà to, kàdi ndìbà dyà dipàngadika dyà ne neúsadilè Kilistò anyi peeshi

neùshaale wa civùmvù mu èkèleeziyà webè. Nènku ncyà bushùwà.

²³² Kùdi bidimba byà èkèleeziyà búngì cyaanàà. Bu bidimba byòns-. . . anyi bantu bàà mu Àmèrikè, bàdi bamba mùdìbo beena Kilistò abu, bafwànyine kwikala beena Kilistò balelèlè, beena Kilistò baledìbwe cyàkàbìdì, mwanèètù, tuvwa mwà kwikala mu dikùbiibwa ànu munùvwà bafwànyine kwikala mu Dyulu, bu nànkù's, bakùbiibwa ku mvità ne ku ntàtu, èyowà's, mukalenge, màsaamà àvwa mwà kuumuka mu ditùnga, ne bikwàbò byònsò.

²³³ Kàbìvwaku mwà kwikala bìmpè anyi bwà kupweka ne mùsèsù ne kumòna kùdi inábànzá ùlwila, ne mulùme awu ne: “Wetwàwu, mwanèètù wa bakàjì? Mwoyi awu, mwanèètù wa balùme”? Ùlwa, kakùyi. . . Kùyi ne didyàbakeena nànsha òmùwè pa buloba to. Bintu byònsò bilengèle ne byà disànkà. Ne mulùmýànà udi ulwa mu disangu dyà mùsèsù; pamutù pàà kukutuuta kukupita, ùvwa mwà kwimanyika, kwamba ne: “Èyo, mwanèètù. Èyo, wèwè uvwa ne. . . Kaa, wèwè nda kumpàla kwànyi,” nudi numòna's, ùjinga ànu. . . Aci kí ncifwànyinekù kwikala cilenga cyà dikèma anyi? [Disangisha dìdi dyàmba ne: “Amen.”—Muf.] Netwikalè naaci, kàdi aci mmu Bukalenge bwà bidimu cinunu, mwanèètù. Ditùkù dìdi ànu dyenda dilwa. Ncyà bushùwà. Pa nànkù mpindyewu katwèna. . .

²³⁴ Mvwa mwimàne ku mutumba kwètù, munwemu ditùkù adi; ncyèna bwalu ne mutumba wètù to, kàdi ndi mwà kumòna bàná bèètù batekète aba. Mukàjàànyi ùvwa ùdila. Ngàngàbukà kampànda wa mu cimenga emu, mwanèndè wa bakàjì mutekète ùvwa wènda ùnyùnguluka ne mwanàànyi mutekète wa bakàjì, nènku mbanangàngàne; too ne mùvwidilàbo kujandula ne dínà dyèndè ùvwa Branham, ne ùvwa mwànà wa Rév. Branham. Aci kàdi kukòsaci bwalu. Mwànà mukèsè wa bakàjì awu kàvwa mwà kwenda kàbìdì ne mwanàànyi mukèsè wa bakàjì awu to. “Èkèlekèle,” mèmè kudyàmbidila ne: “èè, mbìmpè.”

²³⁵ Bàmwè bàà ku beena mutumba naanyi bakesè kuya kuntwàku, kwambabo ne: “Èè, bìvwa ànu bìmpè.” Pa nànkù, kuyabò kùdi mpaasàtà wabò. Kùngambidiku to. Nudi bamanyè's, ntu—ntu ne mùshindù wà kumanya bintu byàbúngì, nudi numòna's. Pa nànkù bóbò—bóbò kuya kùdi mpaasàtà wabò, e kwamba ne: “Udi mumanyè's, kùdi muntu musòmbèle ku mutumba kwètù aku, ùdi ne maalu malenga be kùdi bàná bèètù balela.” Kwambabo ne: “N'Rév. Branham. Ùdi ùbàngata ùbàpàya mu kàshinyi kèndè kakesè kàà kale aku, ne ùkanyùnguluka naabò.”

²³⁶ Yèyè ne: “Èè, uh, *Eyo!* Katwèna ne cilumbù ne Rév. Branham to. Ùdi bìmpè, kàdi, nudi numòna's, yèyè's ùdi ànu muntu wa cipidì cishilàngàne ne citùdi twètù eci.” Eyowà. “Twètù, mvwa—mvw'a kujinga ne kanwikadi. . . nudi

bamanyè's, ncyènakù muswè ne. . . Udi mwà kwakula naabò, ne kwikala ne musàngeelu, kàdi lekela aci ciikalè ndekeelu."

²³⁷ Kaa, mwanèètù! Mukàjàànyì ùvwa mwimàne mwaba awu, udila mwadi. Mémè ne: "Munanga wanyì, s'ke cidì citùtàpulula's. Bwànyì mémè ne nzùbu wanyì, netùsadilè Mukalenge."

²³⁸ Nànsha buloba bwónsò bumbènge; ànu Yesù Kilstò! Nànsha byôbì bikèngela ne mbiikidiibwe ne mukoleshi wa maalu, byôbì bikèngela kwikala mudyombòdiibwè kùdì bilongo byàn-. . . bantu naanyì, ne bintu byà mùshindù awu, Nènsungulè ànu Yesù Kilstò. Kwàta ku cianza cyà Nzambi cidì kaciyi cishintuluka to. Pààkulekela balunda bàà pa buloba, shààla ànu mutambe kuMulamata. Mukwàte Yèyè.

²³⁹ Nzambi, swâkù nyiishe mûntù kacya ncìyì muiishekù kumpàla. Swâkù nyiishe bantu bàdi bàpùnga ne lufù aba, bu muntu udi upùnga ne lufù, mémè mwine. Swâkù nyiishe bantu byenze bu ne ncyàkwikalekù ne mpunga wa kuyiisha dikwàbò diyiisha nànsha. Swâkù mbenzèjè bwà kulwabò ku cyoshelu eku, ne binsònji byènda bitùnkumukila kwìsù kwàbò; bàalukila kumbèlu bakasòmba bu beena Kilstò, ne bàsòmba nànkù ne mitumba yàbò. Bìmanyika cìnkenyà cyònsò eci ne ditàmbàkana, ditùpika ne lukutukutu; ne dyenza maalu mùshindù *ewu*, ne kubìnduluka bwà *cikampànda*, ne kuya mùshindù *kansanga*. Kaa, kanwènji nànkù to. Aci's ndyabùlù. Nyumà yà badémòns ayi yikila beena Kilstò.

²⁴⁰ Vùlukààyi ne, bambi abu kuntwaku, bàvwa bapròfetà abu. Bàvwa bapròfetà. Bàvwa batèndeledi, bàlàmbula mulàmbù. Bàvwa batèndeledi ànu mùdì balongeshi bònsò bàà ditùkù edi, kàdi, mwanèètù, bàvwa ntàntà mule ne kumanya bulelèlà.

²⁴¹ Kanwènakù numòna mùdì dyabùlù mutèndeledi anyì? Dyabùlù kí mubengyanga-, kí ncintu cinène citàmbe bu mùdì communisme, cibèngangana ne bwena Kilstò mu byònsò to. Kí ng'aci nànsha. Aci ncyà, kaa, èè, ncyà dyabùlù, bushùwà, kadi kí ncifwilakanyi ne Kilstò to. Mufwilakanyi ne Kilstò mmutèndeledi wa menemene, mmutèndeledi wa menemene. S'ùvwa n'nyumà wa butèndeledi wàkapopela Yesù pa nkùrusè. Cìtu misangu yònsò ànu bukwa ntèndeleeu, batèndeledi, bàdi bàpopelanganà pa nkùrusè. Mbatèndeledi bàvwa bàlwisha Kilstò mulelèlà. Mbapròfetà batèndeledi bàvwa bàlwisha Miiikà. Mbatèndeledi bàà mu ditùkù edi bàdi bàlwisha Mukenji wà Nzambi.

²⁴² Vùlukààyi ne, ndi munùdimwije. Ndi munwambile. Ncyèna ntàmbe kwakula nangàngà bwà bwena Kàtòlikè, ne ba-Baptistes ne ba-Méhtodistes to; Ndi ngàakula ànu bwà bantu beena cijila, ànu kwishì kwà milongo eku. Cìtàngilaayi leelù, mùdici cisambulùke ne ciimàne mu dinàya. Kaa, ekèlekèle. Ntu mbwelamù, mîngà misangu. Ne mwoyi wànyì ùncibùlùka munda mwànyì emu.

243 Muntu mwimàne kuntwaku ne banjo wa kale, ùtuuta banjo wa kale awu, ne wimbà cindànda aci mùshindù awu ne: “Ewu n’cowboy wa ku Texas *Kampànda awu anyi?*” Ncyèna ne cìndì mfwila ne muntu awu to; kàdi abi mbikùmbànyina pambèlù pààpa mu maalu à pa buloba pambèlù pààpa. Ncyà bushùwà. Mbìpìcìibwa ne mèmè mwimàne, mwanèètù, nciyi nànsha ne cintu to, cyà ne, nciyi ne cintu nànsha cìmwè to, kàdi ngìmana ànu kuulu ngàmba ne: “Yesù, ndamèku pabwìpì ne nkùrusè.” Eyowà’s, mukalenge.

Nkùrusè mulàmbula awu nemmwambùle,
 Too ne mwàmpeesha lufù budìshikaminyi,
 Pashiishe ngààlukilè Kwètù, bwà kuya kaasa
 cifulu cyà butùmbi,
 Bwalu kùdi cifulu cyà butùmbi bwànyì mèmè.

244 Bwènù nwènù baamaamù batekète mwab’ewu mu dindà emu, bàdi baamaamù bàà cyà bushùwà, ne ndi mumanyè ne kùdi bààbùngì bèènù; Ndi ngèèla meeji ne, yònsò wa kunùdi. Lekèlaayi nnwāmbilèku cintu kampànda. Nzambì ànùbènèshè. Nwènù nudi Èvànjeeliyò mwitànù, mmùndi ngèèla meeji. Lekèlaayi nnwāmbilèku mpindyewu bwà bānà bèènù balela, kantu kakesè cyanààna. Bwalu, Mwanèètù Neville pāmwāpa neāyiishè pa . . . bwà maamù dilòòlò edi, anyi ní nganyi mukwàbò, umwe wa kutùdi udi uyiisha, mbìmpè, pa bwalu bwà maamù. Kàdi, tèèlejàayi, ngānji nnùkonkèku cintu kampànda.

245 Vùlukàayi ne, pāvwa Mòsà mwānà wa balume mutekète, maamù ke wakamulongesha. Ùvwa mmaamù wa difwàna dyà Nzambì wakambula Mòsà mukesè awu pa binù byèndè, wàmba ne: “Mòsà,” kumulongesha byònsò. Ùvwa mulongeshi wendè, anyi, maamù ùvwa mulongeshi wendè, èyowà’s, mu bukòdeshi bwà Pàlò, ne kwambayè ne: “Mpindyewu, bintu ebi,” mwākambāye, “Mòsà, dīngà ditùkù neùsungilè bānà bàà Izàlèèlā. Wèwè ki mwānà wa balume mubiikidiibwa. Dilamè wèwè mwinè mukezùke kùyi katòba ku maalu à pa buloba, bwàlu wèwè ki mwānà awu. Wèwè ki yèyè wau.”

246 Katwèna bamanyè mwaba mukwàbò, mutùyekù muye mu sèminèrè kampànda kacya to, dilongesha nànsha dyà kànà, ditùyeku mupetè. Wākashààla ànu mu nzùbù wa bukalenge wà Pàlò, uvwa mwikale mumpàngaanù awu; kàdi mamwèndè wākamulongesha. Awu’s mmaamù mulelèlā. Wākamulongesha mèyi à Mukalenge. Wākamwambila mùshindù ùvwaye ne cyà kwikala wa cijila. Wākamwambila mùshindù ne nsòmbelu uvwayè ne cyà kwikala nendè, ne mùshindù, ne cidi Nzambì ne cyà kwenza, civwaye mwa kumwenzela. Nènku cyàkalamata Mòsà matùkù èndè ònsò à mwoyi.

247 Nènku maamù kanà yònsò mwìmpè, mulelèlā, wa lulamatu ewu wìkala mwà kwangata bānà bèndè, pamutù pà kubàtuma ku sèndemā ne ku maja, ne bikwàbò byà mùshindù awu, kàdi

wíkala mwà kubàteka pa bibelu byèndè ne kubàlongèsha maalu àdi àtàngila Mukalenge Yesù Kilistò.

248 Mwab'ewu ditùkù adi, mvwa nyiikilangana ne maamù kampànda ku tèlefonè. Ki maamù awu kwambayè ne: "Kaa, Mwanèètù Billy," mwàkambaye, "mwanàanyi wa balùme mukwate ne byà luse ùdi mu lutàtu." Kwambaye ne: "Kaa, lutàtu lwine mudiye's."

249 Mèmè ne: "Èyowà, ndi mumanyè pa bwalu abu, mwanèètù wa bakàji, munanga." Ki yèyè ne: "Ùdi mwà kwikala mupiile. Ncyèna mumanyè to." Yèyè ne: "Ewu ùdi wàmba *cikampànda* ne ewu wàmba *cikansanga*. Ncyèna mumanyè to. Kàdi," yèyè ne, "nànsha yèyè mwikàle mupiile anyi mubingè, ndi mumunangè." Ki bwalu mbwòbù abu's: "Ndi mumunangè."

250 Wàkambila mamwèndè, wàmba ne: "Mvwa mutàmbe kudìngiibwa kùdi *cikampànda* ne *cikansanga*." Kwambayè ne: "Maamù, ndi ngiitabuuja ne munanga wanyi umwèpelè ùndi nendè menemene ngwèwè; muntu mukàji udi ne lulamatu kùndi, ne mundamàte." Aci's ke dinanga dyà maamù. Awu's ki maamù mulelèlè udi wela mwanèndè mu citupà. Kàyì ùtàngila ne mmubinge anyi mmupiile to, ùdi ànu ùtungunuka ne kuya. Nènku pìikala Nzambì... Pìikala maamù mwà kwela meeji bu nànkù bwà mwanèndè, munyi mùdi Nzambì mwà kutàmba kwela meeji awu bwà Bèndè. Nudi numòna anyi? Shààla ànu Nèndè. Ndàaku buludi.

251 Nènku mpindyewu lekèlaayi nnwàmbilèku maamù mukwàbò, lùkàsàlùkàsà, mu Bible, kumpàlà kwà twètù kujikija. Kùvwa maamù kampànda ùbìikidiibwa ne Helòdiyà. Ùvwa mulongèshe mwanèndè wa bakàji bwà kutwà maja. Ùvwa muswè bwà kwikalayè mumanyike. Ne wàkajà kumpàlà kwà mfùmù kampànda, ne kulòmbayè mutù wà Yone Mubàtìiji. Tudi ne luumù lwà ndelànganyi yèndè makumi mwandamutekète, yà nsongàkajì ewu wàkajà kumpàlà kwà (mwànà wa bakàji wa Helòdiyà), wàkajà kumpàlà kwà Helòdè awu; makumi mwandamutekète à ku ndelànganyi yèndè, bààkafwà anyi bandumbà anyi bowibwe ku mucì.

252 Maamù umwe wàkalongesha wèndè bintu byà pa buloba; maamù mukwàbò wàkalongesha wèndè bintu byà Nzambì. Umwe wàkalwa mulombodi munène ne mucimunyi, ùdi kàyì ùfwa munkaci mwà bantu leelù ewu to; ne mukwàbò ùdi ndumbà ne ùdi mu ifernò, ne mupulùmùnèmù binunu ne binunu. S'nwamònu cìndi muswè kwamba's? "Kolèshila mwànà mu njila udiyè ne cyà kulonda."

253 Nènku ndi nùtwà nyama ku mikòlò nwènù baamaamù bàdì bakwàte ne byà luse bàdì basòmbe mwab'ewu baase cilòngò cyènù cyà rose citòòke. Kùdi Dyulu dìdì maamù muyè, leelù ewu, mùdi maamù mwimpè wa citembu uvwa ne mwoyi bwà Nzambì,

pàmwāpa musabūke dyāmwāmwa dyā cilāmbā cikūdika. Yēyē mmwindile bwā wēwē kulwa. Ncyā bushūwā.

²⁵⁴ Ndi nnūneemeka ne nnūpa luumū mwaba awu nwēnū bādi baase bilōngō byā rose bikūnze munūdi naabi amu. Mamwēbē pawikalā muswe bwā kumwenzela ní ncinyi ní ncinyi, mwenzelēci matūkū nkāmā yīsātū ne makumi āsambōmbō ne ātaanū ku cidimu. Ndāaku ku nzūbu kwēndē ūmusambidilē, ne ikālā ne mwoyi bwā Nzambi. Ki cintu cyā kwenza ncyōci aci. Ne ukoleshē bānā bēèbē. Nēnku pāākola bēèbē bānā, nebākubiikile ne: “mubēnēshībwe,” paanyimā pāā wēwē mumanē kusabuka dyāmwāmwa dyā cilāmbā cikūdika. Aci ke nyumā mulelēlā wa buumaamū, nyumā mulelēlā wa ditūkū dyā maamū. Ditūkū dyā maamū dīdi matūkū nkāmā yīsātū ne makumi āsambōmbō ne ātaanū ku cidimu.

²⁵⁵ Edi nditūkū ditūbo bāsūmbisha bilōngō ne bāsambuluwilangana mātāpishi, mūdī bāā pa buloba bēnzā. Byōbi ānu bitūngūnūke, buloba bwōbō mwā kwenza bīngā bidimu makumi ābīdi kumpāla eku, nebiikalē ne matūkū ā mwānā wa balūme, matūkū ā mwānā wa bakājī, ne matūkū ā mwanētū wā tāātū mukwābō, ne matūkū ā taatū mukwābō, ne bintu byōnsō byā mūshindū awu abi, ānu bwā kubweja bāā pa buloba mu dibālakana dyā bungēndāmūshīngā. Ki kūdibi byēndā biya nkwōkū aku, bikabwela too ne mu ifernō, ne bukolē bwōnsō mūdibi mwā kuya amu, ku dibūtuka.

Kādi, wēwē, Nzambi ākubēnēshē, ki disambila dyānyī ndyōdi adi. Tūsambilāāyī.

²⁵⁶ Taatū wetū wa kalolo wa mu Dyulu, patūdī tutāngila paanyimā apa, mu dīndā emu, ne meeji ētū, kale wāwa, kūkaadi nkāmā yā bidimu, pāvā Yēhoshāfātā mwimāne mwaba awu ku luseke lwā Mfūmū Aakābā. Ne Nyumā mukēsē wa Nzambi, ucīvwaku mushāāla munda mwā mwoyi wēndē, nānsha mūvwāyē mwenze cilēma amu, kumwambilayē, wāmba ne: “Eci ncibi. Eci ncibi. Ki ncikezūkē to. Ki ncyā cijila to. Muprōfetā mmwambe ne bintu ebi kabīvwa mwā kutūngunuka mūshindū ewu nānsha.” Ke Kapyā kakesē kāā Nzambi kumubiishakū.

²⁵⁷ Ne pāshīshe Wēwē uvwa ne muntu kampāndā bwā kwandamuna Kapyā kakesē aku, mwīnē awu ūvwa m’Miikā, muprōfetā mulelēlā wa Nzambi. Nānsha mūvwābi ne ūvwa mufwānyine kwikala mulwē mwaba awu muvwāla biteetela amu, nānsha mūvwāyē mufwānyine kwikala mulwē mudyombōdīibwe amu, ne bōnsō bwābō bamubānkāmēēne bu musūmbā wā mībwābwā mitāngīle mwānā wa mūkōkō. Kādi wākamba bulelēlā, nānsha mūvwābo bamubāngūle dipī mu mpāla amu, nānsha mūvwābo ne cyā kumwela mu būlokō amu ne kumudiisha dyāmpā ne māyī byā kanyinganyinga amu. Kādi, nānsha nānku, mēyī ākambāyē ākākūmbana, bwalu Wēwē uvwa nēndē.

258 Nzambi, enzàku nàнку, leelù ewu, ne tudi tutàngila mu Bible ewu. Tudi tutàngila ku mikàndà yà èkèleeziyà, mikenji dikumi, ne bikwàbò, byà èkèleeziyà, mishingà, ne tumòna mùdibo bènza *cikampànda*, *cikansanga*, anyi *cikankènga*. Kàdi tutàngilàayi mu Díyì dilelèlè edi, ne tùmònè cidìDi dyàmba adi: “Kakùyi cijila to, muntu nànsha umwe kààkumòna Mukalenge to. Kebaayi ditalala ne cijila, bwalu, byòbì kabìyikù to, muntu nànsha umwe kààkumòna Mukalenge to. Ewu udi munangè maalù à buloba, anyi bintu byà pa buloba, dinanga dyà Nzambi kadyèna munda mwèndè to.”

259 “Mu matùkù à ku nshìikìdilù bikondo byà njiwù nebilwe. Bantu nebiikale badinangi, baditambishi, badileeji.” Kaa, bintu binène abi, Mukalenge, bidì munkacì mwà kwenzeka. “Beena mitù mikolè, badibàndishi, banangi bàà bisànkasanka kutàmba kwikala banangi bàà Nzambi; bàlongesha bantu tunungu twà—twà bantu pamutù pàà mèyi matùma à Nzambi; biikàle ne cimwènekelu cyà difwàna dyà Nzambi, kàdi bàvila bukolè bwà Nyumà Mwîmpè” bwà kuvwija muntu mùle tètè ne Nyumà, bwà kumufikisha ku disànka, bwà kufikisha binsónji ku ditùnkumukabi ku mèsù kwèndè, bwà kumufikisha ku dipàtuka bwà kasambidila babèèdi, bwà kumufikisha ku dyakula mu myakulu, ne kwandamuna, kumufikisha ku dyamba cipròfetà. Nyumà wa Nzambi awu, Nzambi udi ne mwoyi awu, mbaMuumùshe ànu cyanààna mu diswa kampànda anyi cintu kampànda cyà mùshindù awu: “Biikàle ne cimwènekelu cyà difwàna dyà Nzambi, kàdi bàvila bukolè bwàdi.”

260 Éyi Nzambi, swàkù bwà batèeleji bakesè aba, mu ditùkù edi, bàtabulukè lùkàsàlùkàsà, mpindyewu mene, kumpàla kwà ndekeelu wa bikondo kulwayè, ne kutùsanganayè mu ngiikàdilù ewu. Twikalèku, bavwijìbwe bapyabàpyà twètù biinè, mùdi Bible mwambe ne: “Juuka ùdinyukùlùlè wèwè mwinè. Ne konkà njila wa kale, udi njila mwîmpè awu, ne pawàmupeta, wèndelèmù.” Nzambi enzàku ne tùpetèku njila mukàyàbàlè wa kale awu, díbà ditwikalà mwà kwimana pàmwè cyàkàbìdi, bu nkàmà, ne kukwàtangana ku byanza pàmwè ne kwimba misambu.

Nènndondè njila pàmwè ne banyààbanyà
badyombòdìibwe bàà Mukalenge.

Ngaakabanga lwendu ne Yesù ne nenshìdimbe
too ne ku ndekeelu.

Nzambi, twambùlwisheku bwà kwikala ne nsòmbelu awu ne kwikala nàнку.

261 Bèneshàku baamaamù bònsò bàdi basòmbe kaaba aka aba, Mukalenge; bu mutùdi bamanyè ne mbamaamù, bòbò biinè, ne bilòngò bitòòke byasa ku nkoozi yàbò, mu dindà emu, bu civùlukilu cyà maamù munanga mukùlàkàje ukàadi muumuke mu cyalu muyè dyàmwàmwa. Eyi Mfùmù wa Mwoyi,

babènèshékù, Mukalenge. Nènku swàkù bìikalè babènèshìibwe, pààbò, ne swàkù bwà bivùlukilu byà bààbò bânà bìikalè mùdì bidìbo naabì bwà mamwábo amu, piikalàbi ne mmuyè dyàmwámwà dyà cilùlù cikùdika, ku Dyulu dyà butùmbi. Enzàku nàнку, Mukalenge.


²⁶² Nènku dindà kampànda piikalà mwoyi wènda ùdikànga mu mijilu yètù, ne mweyelu wètù wènda ùpanga kubwela munda mwètù, cilùlù necikangukè; neapwekè, pàmwàpa, too ne ku ndekeelu kwà Yadènè, bwà kutùkwàcisha. Kaa, mu ditùkù dyà butùmbi adi patwàtwà makàsà ètù dyàmwámwà, mwikalà kamùyì. . . Kapeepèlè kakààkwikala kanyangùke ne mwìshwì wà mfwankà to. Kamwàkwikala kanwàyì mu mùsèsù to. Kakwàkwikalakù ndumbà to. Kakwàkwikalakù mpèkaatù to. Kakwàkwikalakù cintu nànsha cimwè cyà mùshindù awu to. Kàdi, mu cyendèlèlèlè cyà butùmbi, netwikalè ne mwoyi ne ditalala pàmwè ne Mukalenge Yesù Kilistò ne bânà bèètù balela. Nènku, kaa, ditùkù dilenga kaayìpu's wè.

²⁶³ Éyi Taatù, pàdi mîdimà minène mikùlùke apa, mvità, ne dyabùlù wènda ùbùcikila matùnga apa, ne wènda ùbùcikila byambilu, wènda ùbùcikila maèkèleeziyà, wènda ùbùcikila bantu, wènda ùbùcikila midimu, wènda ùbùcikila bimenga, ne bilongelu ne mbànà; Éyi Nzambi, tükwàcishèku bwà kwimana, kufyonona mwelè wà mvità ne lùkàsàlùkàsà bwà kulwangana bwà Nzambi, bu mwàkenza Mòsà ne—ne beena Lewi kuntwaku pàvwà mpèkaatù mu citùdilu apu. Tükwàcishèku, Mukalenge.

²⁶⁴ Tùfwilèku luse mpindyewu, ne túbènèshèku. Ne tulamèku badipwekèshe, tucibùlùlèku, Mukalenge. Éyi Nzambi, Wèwè wákamba ne: “Ewu udi upàtuka, ùmyamina mamiinu ne binsonji, kakùyì mpatà to nealukilè kàbìdì, wènda ùsànka, mwambùle myepu.” Éyi Nzambi tucibùlùlèku tutùpà tutùpà. Tùfwimbèku, cyàkàbìdì, Mukalenge. Tudi tutàmba kupàtukapàtuka mu njila be.

²⁶⁵ Ndi, mèmè mwinè, Mukalenge, ndi mufike mu cipidì cyà ndyèlèla meeji ne mbantu bùngi kaayì bwàbwelà mu disangisha dyànyì. Éyi Nzambi, ndi muswè bwà Wèwè kubwela. Lwàku, Mukalenge! Éyi Kilistò, lwàku Mukalenge! Ncibùlùlaaku, mfwimbùlùlè. Éyi Mukalenge, kwitabikù, nànsha byà munyi kùndekèdikù mbweja bintu abi mu meeji ànyì to. Nzambi, bitàdikila ànu kule nànyì.

²⁶⁶ Nkwàcishèku, Mukalenge, bwà kuyiisha, mungàmbi, kwènji katancì, bu muntu ùpùnga ne lufù kùdì bantu bàdi bàpùnga ne lufù, bamanyè ne twètù bònsò tudi ne cyà kukungamangana ne Cyendèlèlèlè. Tudi ne cyà kwimana kumpàla Kwèbè; dîbà dyùdì Kùyì mu ngenzèlù Wèbè wa musànggeelu, dîbà Dyùdì kùyì ne luse, dîbà Dyùdì mwimàne kùyì ne luse; dîbà Dyùdì mwimàne, ne ciiji, bwà kutwàla dinyooka pa matùnga ne pa bantu bàdi babènge ne badyombòle dinanga dyà Mwànà Wèbè.

²⁶⁷ Nzambi, mpèèshèku luse pàmwè Nendè leelù ewu, bwà ne mu Ditùkù adi ndi mwà kwimana ne ditwishiiibwa. Tudi mwà kwikala ne cya kudila mpindyewu, kàdi Wêwè neùbìkùpùle, bwà kulwabì disànka, mu dîbà adi, paWàmbà ne: “Bwelàayi mu masànkà à Mukalenge, àdì manùlongolwela kacya ku difùkà dyà dyulu ne buloba.” Nzambi, ikàlàku neetù mpindyewu, ne tükwàcìshèku, tudi tulòmba, mu Dîna dyà Yesù. Amen. 

54-0509 Dibùcikila Dyà États-Unis
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyî dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwê anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilsto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org